

# 1 Korinti

*Pauloŋe kulem ire kulemgoep.*

<sup>1</sup> Nâmâ Paulo Yesu Kristo yâkgât Aposolo Anutuŋe emelâk Aposologât âiân makmâ katnegep. Nâ akto galanenŋe kotŋe Sostene olop <sup>2</sup> Korinti kepiân gâtŋe Anutugât kâmot yengât kulem ire kulemgoet. Ulikŋân Anutuŋe ikinŋe hanŋe watmâ oloŋ yekmâ nâŋgât dâtâŋe dâm yengonlep. Yengondo Anutuŋe ye akto luâk bikŋe bikŋe yâgâten manmai amâ Yesu Kristo amâ Humonenŋe dâm manmai ye akto nen hârok Humonenŋe dâm konmaen, arekŋe nen hengemgo nenekmap.

<sup>3</sup> O galalupne, nâŋe Anutu Ewenenŋe akto Yesu Kristo Humonenŋe yengât hin ulityetkiman. Korinti gâtŋe yengât biwiyenŋe mem hengemgom damunyenŋe akmâ okot nâŋgâyengim biwiyenŋe sândugeâkgât akyengimbela hainâk tatmâ âgâwai. A bundâk.

*Pauloŋe Anutugât nâŋgâmbô ârândân agep.*

<sup>4</sup> Akto Yesu Kristoŋe biwi âlep akyengim damunyenŋe akmap aregât Anutu âlepŋerâm aregât Anutu okot âlep nâŋgâ aŋmâ mepainŋe meman. <sup>5</sup> Akto Anutuŋe Yesu Kristogât akmâ wât yengimbo den bunŋe dâmbiâ nâŋgâ nâŋgâyenŋe akto denyenŋe âlepŋeâk miawak yengiep <sup>6</sup> aregât nen Kristogât keiŋe makyengiyion ain Anutuŋe nâŋgâ nâŋgâyenŋe hulaŋ yengim meme akyengimbo dennenŋe bunŋe agep. <sup>7</sup> Hain akto sop hinŋe amâ Yesu Kristo

lâuwâne purik katbiap dâm lâmgomai amâ Anutunje wan me wangât laune lokowaigât umburuk akbâirâm tânyengumap. <sup>8</sup> Akto sop kâlep manmâ hâkân akbâigât yâkne tân yengumap aregât Humonnenje Yesu Kristo are lâuwâne purik katbiawân ainâk ye han biwiyene âlepneâk okot âlewân kinbai. <sup>9</sup> Akto Anutunje emelâk nanje olop biwi konok mannetgât makmâ hâriep are bunje bo akbopgât dop bo tatâp aregât Humonnenje Yesu Kristo olop biwi konok manmai. Manbiâ amâ siân Yesu togowiawân yekto dosayene bo akbiap.

*Korinti gâtjande potalagi.*

<sup>10</sup> Galalupne, ye Yesu Kristogât kotne mem agatmâ lau lokoanmai aregât agak meme hin aknet. Ye hârok agak meme konogâk akbei. Akto bo potalakbei. Akto ye hârok nângâ nângâyeje konok akto han biwiyene konok akmâ manbei. <sup>11</sup> Aregât lâuwâne makbe. Âmbâle siâ kotne Kolowe yâkgât kâmolân gâtne bikne nângâlân togom hin makniñi, “Galalupge Korinti hânân manmai areyengât hutyenân kuk humo yendâp.” dâyi. <sup>12</sup> Akto yengâlân gâtne bikjande hin dâmai, “Nen amâ Paulogât kâmolân gâtne.” dâmai. Dâ bikjande amâ, “Nen amâ luâk siâ kotne Apolo yâkgât kâmolân gâtne.” dâmai. Dâ bikjande amâ, “Nen Petorogât kâmot.” dâmai. Dâ bikjande amâ, “Nen Yesu Kristogât kâmot.” dâmai. Ye hain dâmai aregât nângâre ârândân bo akmap. <sup>13</sup> Akto yengât pat nângâm amâ hin nângân. Kristo amâ potalakmâ bikne bikne bo agep. Akto nâne yengât dumyenân lâwinân bo kilân. Nângât kolân tuân bo kat yegi. <sup>14</sup> Yengât hutyenân luâk lâuwâ siâ kotne Kirisipe

akto Gaio, yâk konok tu puli yelegân. Dâ luâk bikne tu bo puli yegân aregât nâ Anutugât okot âlep nângân. <sup>15</sup> Ageine yengâlân gâtne biknande, “Nen Paulo kotne kondenne tu puli nenegi.” dâwai aregât dâp bo tatâp. Gârâmâ nâ Anutuņe wan me wan agep aregât okot âlep nângâ anman. <sup>16</sup> Woe, nelâm niņdâp. Bundâk Stepana akto yâkgât kâmot amâ tu puli yengiân. Dâ yengât kâmot bikne amâ tu puli yengiân me bo amâ bo nângân. <sup>17</sup> Aregât hin makbe. Nâ Kristone luâk âmbâle tu puli yekben dâm bo huņgun niņep. Nâmâ Anutuņe hin dâm makniņep, “Den pat âlepne are makyengiwen.” Amâ luâk nângâ nângâgât bo makyengiman. Hain akman dâine Kristone lâwinân moepgât kârikneņe yânne akbop.

*Yesu amâ Anutugât kârikne akto Anutugât nângâ nângâne.*

<sup>18-19</sup> Akto Yesu lâwinân kombiâ moep aregât den pat âlepne aregât keiņe makyengiwe. Anutuņe makto Yesaiane kulengoep aregât bikne hin tatâp, “Nâne nângâ nângâ luâk yengât nângâ nângâyeņe mem bâliwian. Akto nângâ nângâyeņe olop yâk yengât den kondere gewiap.” Anutuņe hain dâmbo bunne akto luâk âmbâle bikne wan me wan akmâ hilipkowerâm Yesu lâwinân kilep aregât denne makmaen are amâ den yânne dâmai. Akto luâk âmbâle bikne Anutuņe menenekmap nenne aregât nângâm amâ lâwingât denne heņgem nengumap aregât den are amâ Anutugât kârikne mem miawakmap dâm nângâmaen. <sup>20</sup> Aregât nângâ nângâ luâk amâ yâgâte? Dâ luâk biknande kulem siâ siâ oyaņmâ nângâm heņgemgomai

âmâ yâgâte? Dâ sop iregât keiŋe nâŋgâ nâŋgâ luâk amâ yâgâte? Amâ Anutuŋe hângât nâŋgâ nâŋgâ mendo yânŋe akmap. <sup>21</sup> Aregât keiŋe amâ hin. Anutu nâŋgâ nâŋgâŋe humo yendâp aregât nâŋgâm ikiŋaet hanŋe watmâ hin dâep, “Luâk âmbâle nâŋgâ nâŋgârâ arekŋe nâŋgât keiŋe nâŋgâwaigât dop bo tatâp. Akto nâŋgât hoŋ bawa luâk den pat âlepŋe makbai aregât pat nâŋgâ nâŋgâ luâk are nâŋgâm den gulip dâwai. Gârâmâ luâk âmbâle bikŋe den pat ire âlepŋe dâwai.” dâm aregât huŋgun nengimbo maktenŋe luâk âmbâle bikŋande biwiyeŋe Yesugâlân katbiâ Anutuŋe heŋgem yeŋgumap. <sup>22</sup> Yuda luâk âmbâle kulem membiâ ekne dâm aregâlâk nâŋgâmai akto Yuda luâk âmbâle bo manmaiŋe nâŋgâ nâŋgâgât keiŋe hekat nengimbiâ nâŋgâne aregâlâk nâŋgâmai. <sup>23</sup> Gârâmâ nenŋe yeŋgât ukenŋe bo watmâ Kristo lâwinân moep aregât makmaen den are Yuda luâk âmbâle arekŋe nâŋgâm, “Den ire hiaŋgimai.” dâm hâkâŋ akbiâ nâŋgâ nâŋgâyeŋe gulip akmap. Akto Yuda luâk âmbâle bo manmaiŋe are nâŋgâmbiâ yânŋe akmap. <sup>24</sup> Dâ Anutuŋe nâŋgât dâtâŋe dâm oloŋ nenegep nen Yuda luâk âmbâle me Yuda luâk âmbâle bo manmai nen hârok hin nâŋgâmaen, Kristoŋe amâ Anutugât kârikŋe miawagâkgât lâwinân kombiâ mondo Anutugât kârikŋe akto nâŋgâ nâŋgâŋe humo miawagep nâŋgâmaen. <sup>25</sup> Amâ hin. Anutuŋe makto nanŋe moep are bikŋande nâŋgâmbiâ yânŋe akmap arekŋe luâkgât nâŋgâ nâŋgâyeŋe ewangimap. Akto Anutugât nanŋe moepgât nâŋgâmbiâ gemap arekŋe luâk yeŋgât kârikŋeyenŋe ewangimap.

26 Galama, hinje maktân aregât keñe makyengire nângâñet. Yeñe agak memeyenje akmâ memini are nângâi me? Anutuñe yeñgondo yâkgât kâmolân dewatiyi aregât nângâm hengemgowe. Yeñgâlân gâtñe bikñande nângâ nângâyeñe aregât luâk âmbâle bikñande nângâ yeñgimbiâ geminep. Dâ yeñgâlân bikñe luâk kârikñe bo miawakyeñgiminep. Akto bikñe luâk kotdâ bo akmini. 27 Gârâmâ Anutuñe aregât luâk nângâ nângârâ are hanâk dâm luâk dewunyenân humomo akmâ âgâ âgâñe akmai are âmâ añun meyeñgiwiapgât luâk âmbâle yânñe gegenje dâm nengomai nen âmâ oloñ nenekto nângâ nângâ luâk âmbâle arekñe nenekmâ añun añgim pâpkomai. Akto luâk âmbâle bikñe, “Kârikñe akmaen.” dâmai are Anutuñe añun meyeñgiwiapgât luâk âmbâle yânñerâm nengonmai nen amâ oloñ nenekto luâk âmbâle kârikñe arekñe nenekmâ añun añgim pâpkomai. 28 Akto Anutuñe luâk âmbâle âgâ âgâñe kotdâ yeñgonmai are yânñe akbaigât luâk âmbâle yânñerâm nengonmap. Nen âmâ oloñ nenekto luâk âmbâle kotdâ are amâ hâmbâi añun añgim yânñe akbai. 29 Anutu wangât hain akmap? Hingât. Siân Anutugât enemñân kinbaenân siâñe ikinje kotñe mem agatbiapgât dop bo tatâp. 30 Aregât Anutuñe ikinjak konok hengem yeñguep. Akto Anutuñe ikinje konok Yesu Kristo olop dewati nenekto kindenñe manman âlepñân kat nenegep. Akto areâk bo. “Yesu Kristoñe nângât kâmot wan me wan umburuk manbâi aregât bunñe yeñgiâk.” dâm huñgun añep aregât nângâ nângânennje miawakmap. Akto Anutuñe

nenekmâ dosayene bo tatyengiâp dâmap are miawagâkgât hungun anjo giep. Akto aregâlâk nângâm yâkgât lau lokomaen aregât wan me wan Yesune âi mendo hain agep. Akto Yesune hin dâep, “Dosa akmai aregât Ewenande kuk bo akyengiwiapgât nunaet kâmot yengât dumyênân kinbian.” dâep are bunje miawagâk dâm ikinje nengât dumnennân kilep. <sup>31</sup> Aregât Anutune makto Yeremiane hin kulengoep, “Luâk âmbâle yenjaet kotyene bo mem agatbei. Humo nennaet kotne mem agatmâ herone aganbei.” Hain yendâp aregât keine miawakto kotnenne mem agatbaengât dâp bo tatâp.

## 2

*Paulone lâwin parânjaet keine makmâ miawagep.*

<sup>1</sup> Galama, aregât nâne yengâlân togom âmâ Anutugât pat makyengiwerân âmâ luâk kotdâ are yengât pat bo makyengiân akto nângâ nângâ humo olop bo makyengiân. Bo. <sup>2</sup> Yesu Kristo lâwinân moep aregâlâk makyengiân. <sup>3</sup> Akto yengâlân pup pup togoân sop ain âmâ kârikne bo miawak ninjep. Akto hamep akmâ ongâ hogo hogo malân. <sup>4</sup> Akto den magân are amâ luâk nângâ nângârâne makmai hain bo magân. Amâ Anutugât Heakjande meme akyengimbo nângât den nângâmbiâ kârikne agep. <sup>5</sup> Akto luâk yengât nângâ nângâyenjande tân yengumbo nângâwâi dâm makyengiân. Amâ Anutune tânyengumbo han biwiyene yâkgâlân katmâ manmâ nângâ anbei dâm makyengiân.

*Anutugât nângâ nângâ kârikne.*

6 Gârâmâ Yesugât luâk âmbâle bikņe handâ are Anutugât keiņe nâņgâwerâm aktâi are nâņgâ nâņgârâņe den makyenġimaen. Akto nengât den ire amâ nâņgâ nâņgârâ luâk kembu manmai are hâmbâi yânņe akbai areġât den hainare bo mak yenġimaen. <sup>7</sup> Bo. Ulikņân Anutuņe hân himbim bo liulewân ain den keiņe nâņgâm henġemgom hin dâep, “Nâņgât kâmot han kau akmâ manman âlepņân manbai.” dâm makmâ kalep. Anutuņe hain nâņgâmbo luâk âmbâle miawakbiâ den nâņgâ nâņgâ are heambugep. <sup>8</sup> Akto hângât luâk kembu humomo mali irekņe den pat ireġât keiņe bo nâņgâyi. Bo dondâ. Dâ nâņgâyi dâine amâ Pagaleņe Amboņe Humonenņe are lâwinân bo kombâi. <sup>9</sup> Areġât Anutuņe makto kulemgoyi bikņe hin tatâp,

“Anutuņe yâk han kalem aganmai yâk yenġât pat mem yenġiwiap are amâ luâk âmbâleņe bo ekmai akto bo nâņgâmai. Akto han nâņgâ nâņgâyeņande bo nâņgâm henġemgomai.” hain tatâp.

<sup>10</sup> Are bunņe miawakto Anutugât Heak are hunġun anġo biwinenņân mendo kotņe siâ siâ are nâņgâm henġemgoyion. Areġât keiņe amâ Anutugât Heak kârikņe are konokņe ekmap. Ain tatmapġât Anutugât wan me wan are hârok ekmâ metemap. <sup>11</sup> Akto luâk siâņe luâk siâġât biwiņe ekbiapġât dop bo tatâp. Dâ luâk are ikinak biwiņe kâlegen tatmap arekņe konok ikinęe biwiņe kâlegen ekmap. Areġât luâk niņande Anutugât nâņgâ nâņgâņe are ekmap? Areġât dâp bo tatâp. Anutugât Heak konok arekņe Anutugât wan me

wan ekmâ nângâmap. <sup>12</sup> Anutuņe hângât nângâ nângâ bo nengiep. Borondâ. Gârâmâ Anutuņe, “Nângât kâmot wan me wan owâi akmâ yeņgiwian are nângâņet.” dâm ikiņaet Heak kârikņe huņgun aņdo kautnennâņ miep. <sup>13</sup> Akto hângât nângâ nângâņe bo watmâ âmâ Anutugât Heak kârikņande kautnennâņ memap arekņe den pat âlepņe maknengimbo den keiņe hekat yeņgimaen. Akto nen Heakgât den bunņe aregât makmâ den patņe makyeņgimaen. <sup>14</sup> Dâ luâk âmbâle bikņe Anutugât Heak arekņe bo meyegep arekņe Heak âlepņe are wan me wan nengimap are bo memai. Aregât lâuwâņe makbe. Hângât luâk âmbâle arekņe, “Woe, Anutugât Heak âlepņe arekņe luâk âmbâle wan me wangât biwiyeņe Anutugâlân katmai are yeņgimap are amâ yâņe.” dâm hâkâņe akmai. Hain dâmai aregât Anutugât Heak âlepņe arekņe okot âlepgât ikiņaet wan me wan luâk âmbâle hain akmai are bo yeņgimap. <sup>15</sup> Dâ nen biwinenņe Yesugâlân kalion nengât keinenņe amâ hin. Kristogât nângâ nângâņe emelâk nengât biwinenņân talep aregât wan me wan hâkgât siâ siâ are potat yeņgimaen aregât luâk siâņe hâknennē tunmâ denân bo kat nenekbiap. <sup>16</sup> Aregât Anutuņe makto Yesaianē hin kulengoep,

“Luâk âmbâleņe Anutuņe wan me wan nângâmap are nângâm heņgemgowaigât dop bo tatâp. Akto siâņe Anutu nângâ nângâ hekalaniapiagât dop bo tatâp.”

Gârâmâ nenâmâ Kristogât nângâ nângâņaet den mem manmaen.



### 3

#### *Korinti gâtjande potalakmâ bikņe bikņe agi.*

<sup>1</sup> Galalupne, nâ yeņgâlân togo tatmâ ye hângât nâņgâ nâņgâ nâņgâmai aregât nâņe ye nanaņ gurukņe yeņgât dop akmâ Kristogâlân biwiyeņe getek kali dâm yaiwâk den yeukņe makyenġiminiân.

<sup>2</sup> Akto ye sot kârikņe nemberâigât dop bo aregât nanaņ gurukņe dop hainâk manmai dâm sot lâwindâk kârikņe bo yeņġim âmâ namâk hainâk yeņġiân. Akto hinņe hainâk biwiyeņe Yesugâlân kârikņe bo kali. <sup>3</sup> Yeņe galalupņe gasa akyenġimai akto potalakmai aregât hin dân, Ye âmâ hân luâk yânņe akto Heak bâlâk akmai dân. <sup>4</sup> Ye bikņe, “Nen Paulogât kâmot.” dâmbiâ bikņande, “Nen Apologât kâmot.” dâmbiâ papalakmâ kotyene mem agatmâ galagât hogo hogo akmâ nâņgâ aņġimbiâ gemap aregât hângât luâk âmbâle hainare akmai aten.

<sup>5</sup> Apolo amâ wan akmap? Paulo nâmâ wan akman? Net amâ hoņ bawa Anutugât den makyenġietņe nâņġâyi. Aregât Kembuņe âi makmâ hârenetkiep dop areâk meyiot. <sup>6</sup> Nâmâ alekņe mem kâmelân. Dâ Apolo amâ âi hele aregât âiņe miep. Dâ Anutuņe âmâ memene waņdo bunņe miawagep. <sup>7</sup> Aregât mem kâmetman nâņġât bo makbaen. Akto âi hele memap yâġġât ġai bo makbaen. Meme agaņdo bunņe miawakmap Anutu yâġġât konok makbaen. <sup>8</sup> Akto mem kâmetman akto âi hele akmap net dopnetņe konogâk. Aregât hâu âmâ âi netjaet dopņân mem potatmâ memaet. <sup>9</sup> Net Anutugât bêt tângo, dâ ye âmâ Anutugât âi akto Anutugât emet. <sup>10</sup> Aregât

Anutuņe han kalem akmâ meme akniņep dopņân nâ emet mângim bunņande hambo tetembeņe kârikņe kât are katere giep. Dâ nen hârok emet mângi mângigât âi damunņe akmâ manne. <sup>11</sup> Akto hambo gem kindâpgât Yesu Kristo mem petâm panmâ siâ katenņe gewiap aregât dop bo. <sup>12</sup> Akto den dopņe maktân are dewatim makbe. Luâk siâņe tetembeņe are kakņân âi âlepņe mem âmâ kât goli me siliwa me puli humo panmâ lâwin kârikņe âlep âlep are mem âmâ emet kârikņe ketuguwiap me dowâk metewerâm konam akmâ lâwin yânņe me dakerâ mâpmâpņe hanâk hanâk mem togo ketuguwiap. <sup>13</sup> Benņe hilâm siân umatņe miawakmâ kâlâpņe ondo âmâ luâk âi miep aregât keiņe miawakbiap. Âlepņe me bâleņe miep aregât keiņe miawakbiap. Dop hainâk nen Yesugât âi mem manmaen amâ hâmbâi Anutuņe sop humoân nengât âi dop kom ekberâm âmâ kâlâp kato ondo nengât âi meme gain gain hinare miawakto ekbaen. <sup>14</sup> Akto luâk siâņe Yesu emelâk meyi are yeņgâlân arim ain âi âlepņeâk mendo kinbiâ Anutuņe dop kom ekmâ âlepņerâm hâuņe âlepņe waņbiap. <sup>15</sup> Dâ luâk siâ âi mendo kâlâpņe wan me wan oarņo âiņe akto hâuņe bâlâk tatmâ manbiap. Dâ ikiņe âmâ kâlâp ululunņânba âlepņe tatmâ âgâwiap.

*Nen âmâ Anutugât opmân bunņe.*

<sup>16</sup> Galalupne ye âmâ Anutugât dengât opmân aregât Anutugât Heakņe biwiyeņân tatmap. Are bo nâņgâmai mon? <sup>17</sup> Akto Heak âlepņande emet ain tatmâ nen olop manmap. Aregât gasalupnenņande Yesugât kâmot gasa aknengiwerâmbiâ

Anutuŋe, “Kâmot ire amâ nângât aregât nâ olop manmai.” dâm gasalupnenŋe yeŋgumbo mombai. Amâ ye Anutuŋât sumbe emetŋe hainare aregât.

<sup>18-20</sup> Akto Anutuŋe makto siâŋe hin kulempoep, “Anutuŋe nângâ nângâ luâk are yeŋgât nângâ nângâyeŋe are mem âmâ luâk are yeŋgumbo gulip akbai.” Akto bikŋe hin tatâp, “Humoŋe âgâ âgâŋe luâk yeŋgât biwi nângâ nângâyeŋe amâ ekto yânŋe akmap.” hain tatâp. Aregât hângât nângâ nângâ amâ Anutuŋe ekto bunŋe bo akmap. Aregât ye bi-wiyenŋe bo hianbei. Akto luâk hutyenân gâtŋe siâŋe, “Nâ hân iregât agak meme watmâ manmâ nângâ nângâne humo aktâp.” dâmap âmâ yâkŋe nângâ nângâŋe are hamiaŋdo hângât luâk âmbâle ekmâ ire âmâ luâk kopa dâmbiâ âmâ Anutuŋe, “Luâk ire nângâ nângâŋe hinŋe humo aktâp.” dâwiap. <sup>21</sup> Aregât yeŋe luâk siâgât kotŋe bo mem agatmâ yâkgât nângâ nângâŋe bo watbei. Akto siâ me siâ hârok yeŋgât tatmap. <sup>22</sup> Nâ Paulo akto Apolo akto Petoro tânyenŋunerâm manden. Akto hângât wan me wan me manmaen me mombaen me wan me wan hinŋe tatmap me beirâ miawakbiap are hârokŋe tânyenŋuwaengât manden. <sup>23</sup> Akto ye amâ Kristogât mandâi. Akto Kristo amâ Anutuŋât manmap.

## 4

### *Aposolo yeŋgât keiyenŋe.*

<sup>1</sup> Yeŋe âmâ nenŋe makyenŋimaengât hin nângâwei, “Pauloma Kristogât keiŋe maknengimai. Hoŋ bawa aganmâ Anutuŋe ulikŋân yonâk kalep are mem makmâ miawakmâ damunŋe akmai.” dâwei. <sup>2</sup> Akto luâk siâŋe hoŋ

bawa siâgât makto launje lokom âi mendo ârândân akmap dop hainâk âi damunje akmâ heŋgemgom mandenje ârândân akmap. <sup>3</sup> Akto nunaet keine makbe. Ye me luâk mendugu menduguân yâkne luâk nângâ nângâyenân nângât denân hâknân hâknân makbai amâ nângâre bunje bo akbiap. Akto nunak âkâ nâ nunak den âiân bo kalakbian. <sup>4</sup> Bunje nunak âi bikne mesogân me bo amâ bo nângân gârâmâ Humo ikinjak âmâ nângât keine me agak memene ekmap. Akto denân kat nekbiap. <sup>5</sup> Aregât ye Humogât sop boâk miawaktoân luâk âmbâle hâkyenje tunmâ denân bo katyekbei. Akto sop are miawakto âmâ Humonenje ikinjak gem âmâ ainâk ikinjak wan me wan bo nângâmaen are mem miawakbiap. Akto hannenjan me biwinenjan wan me wan nângâmaen are hainâk mem miawakbiap. Akto sop ain âmâ Anutunje nen hârok âi nenjaet hâu nengiwiap.

<sup>6</sup> Galama, wan me wan yu kulemgoân ire amâ Apolo me nâ netnaelân katmâ maktân. Amâ hingât maktân. Ye nângâm heŋgemgom Anutunje makto kulemgoyi are wan me wan yendâp aregât bo lonjaiwei. Hain akmâ yençaet nângâmbiâ bo agatbiâp. Akto gala yengât nângâmbiâ bo gewiâp. <sup>7</sup> Akto niñande potatyekto luâk âmbâle bikne ewangiyektâi? Akto wan me wan memai are Anutunje yengiep, aregât wangât hin dâmai, “Wan me wan ire siâne bo nengiep akto nângâ nângâ nenjaelânba miawagep.” hain dâmai? Amâ bo ârândân akmap.

<sup>8</sup> Akto ye hin makbiâ nângân, “Emelâk nângâ nângânenje humo aktâp. Akto wan me wan emelâk ârândân agion. Paulo akto Apolo bo

tân nengumbelan nângâ nângârâ agion.” dâmai, amâ netje bo tânyenjuetje luâk kembu bo akmai. Wangât ye hain nângâmai? Ye agak meme yeje âlepje dâine ye olop herone akbâen. <sup>9</sup> Aregât hin nângân. Anutuje aposololupje nen âmâ luâk yânje yâk yengât kâmolân katnenegep. Bugâgât pat agakje hainare, hârok dondâje anjelo me luâk nenekbiâ bâleje hainâk hinare akmaen. <sup>10</sup> Nen Kristogât akmâ luâk nângâ nângâ bâlâk akmâ gayion. Dâ ye âmâ Kristogâlân dewatim nângâ nângârâ humo akmâ gayi. Nen âmâ yeukje gegeje akmâ gayion. Dâ ye âmâ kârikje olop akmâ gayi. Ye âmâ bikjande yekbiâ humo âgâ âgâje akmai. Dâ nenekbiâ gegeje akmaen. <sup>11</sup> Aregât nen âmâ tu sotgât mom bâlim manmâ gayionneak manmâ gaen. Akto himbân hambujeâk lalakmâ Yesugât keje bo nângâmai arekje kuk hengânâk nenekbiâ emet kepia bâlâk manmâ gayionneak manmâ gaen. <sup>12</sup> Akto nenje bânennjande puligât âi humo memaen. Akto hâkgât luâk âmbâleje den hem-balik makmâ girin nengimai. Hain akbiâ âmâ nen âmâ Humoje tân yenguâk dâm ulilanmaen. Akto yâkje âmâ kuk hengân aknengimbiâ âmâ ainâk hâuje bo yengim âmâ nângâm hansumbu akmaen. <sup>13</sup> Yâkje den bâleje makmâ kotnenje mem gembia nen âmâ benje ainâk lumbe den makyengimaen. Ulikjân akto hinje hainâk akmai. Nen âmâ luâk âmbâle yengât gagap panpanje hainare akmâ gayionneak manmâ gaen.

*Pauloje Korinti luâk âmbâle ewe akyengjep.*

<sup>14</sup> Galalupne, nâ den kulengoân ire ye anjun meygâkgât bo kulengoân. Nâ ye nananjupne dop

hainâk akmaigât okot âlep nângâ yengiman aregât den sami akyengim damun aganji goanji akjetgât den ire kulengoân. <sup>15</sup> Bunje ye damunyeje akmâ Kristogât agak memeân damunyeje akmai are unduwâk tatyengimai gârâmâ den pat âlepje pup pup makyengiminiân a undup akmâ bo. Nune konok yengâlân togom pup pup eweyeje dop hainâk akmâ den pat âlepje makyengire den pat are âlepje nângâyi. <sup>16</sup> Aregât hin hâmbinmâ wârakyeke. Nâje agak meme akman are hainâk akbei. <sup>17</sup> Are miawagâkgât nângâm Timoteo biwiye Humogâlân kalep yâk yengâlân hungunandere togoâp yâk âmâ nanne hinare okot âlep nânganman yâk âmâ nâje kepia ârândân ari Yesu Kristogât mendugumai aregât emetje ain makyengiman aregât makyengiwen dâm hungun andere togoâp. <sup>18</sup> Akto yengâlânba bikjande Paulo bo togowiap dâm âgâ âgâje agi. <sup>19</sup> Dâ Humonenje yâkje âlepje dâmbo âmâ yengâlân dowâk togowian. Togom âmâ sop ain luâk âgâ âgâje yengât bo nângâm âmâ agak memeyeje areâk ekbian dân. Togom yengât den bo potatmâ nângâwaen. Amâ agak memeyeje areâk ekmâ potatbian. <sup>20</sup> Akto Anutugât kâmot yengât kârikjejeje amâ den makmai are bo. Bo kârikje. Patyejande amâ kârikyeje mem miawakmap. <sup>21</sup> Aregât togowianân gain gain nângâwai? Orem miwindik yekbiangât kuk akmâ togowian me? Okot nângâ yengim yeukjân togowian?

*Luâk bâleŋe miep aregât den.*

<sup>1</sup> Galalupne, yeŋgât den are siânbaŋe makniŋbiâ nâŋgâre ârândân bo aktâp. Agak meme bâleŋe hain arekŋe âmâ luâk âmbâle Yesu bo nâŋgaŋmai are yeŋgât hutyeŋân miawakto aŋun aŋiwâi. Dâ ye âmâ bo aŋun aŋgiâi. Bâleŋe are amâ hin. Yeŋgâlân gâtŋe luâk siâŋe eweŋaet âmbenŋe miep.

<sup>2</sup> Hain akto bâleŋe dondâ miawagep. Aregât wangât yeŋe yeŋaet nâŋgâmbiâ âgâmap? Hain bo. Bâleŋeyeŋe nâŋgâm makmâ miawakmâ okot bâle nâŋgâm mandâi dâine ârândân akbop. Aregât dowâk luâk are hepunmâ watbiâ yeŋgâlânba ariwiap.

<sup>3</sup> Dâ hâknande âmâ kâlewângen mandân dâ nâŋgâ nâŋgânande amâ hutyeŋân mandân aregât luâk bâleŋe miep yâkgât dosa miawagâkgât hin makmâ hâreân.

<sup>4</sup> Yesu Humonenŋe yâkgât kolân konmâ luâk aregât den katmâ maktân. Ye mendugum kinmâ nâŋgât den nâŋgâm akto Humonenŋe Yesu Kristogât kârikŋe olop kinbai

<sup>5</sup> âmâ ainâk Niambiŋe hâkŋe mem bâlimbo han biwiyeŋe potalagâkgât luâk are watbiâ ariwiap. Hain arim manmâ manmâ âgâambo âmâ hâmbâi Humo are togowiawân âmâ Anutuŋe oloŋdo ikinŋaet kâmolânâk dewatiwiap. Are miawagâk dâm luâk are watbei.

<sup>6</sup> Ye âgâ âgâŋe akmai are nâŋgâre bâliâp. Luâk bâleŋe agep aregât keiŋe den dopŋe hin makbe. Nen âmâ bau wiŋe bâleŋe siâ are bo mem panmâ are olop sot ondenŋe âmâ bâlimap. Amâ kalakŋe akmap. Dâ ye dop hainâk bâliwâigât luâk konok are watbiâ akŋângen ariwiap.

<sup>7</sup> Nengât lama dosanenŋe bo agâkgât Kristo yâkŋe nengât sumbe akmâ moep aregât akmâ kalakŋe bâleŋe are

potatmâ panbiâ arimbo bunje âlepje areâk akbei. Gârâmâ emelâk irakje maligât. <sup>8</sup> Hombaŋ irakje tatnerâm siâ me siâ kalakje âmâ hârok paniâm. Galalupnenje yengât nângâenne gemapgât akto bâleje malejegât kalakje panmâ âmâ han kau kau akto bunje den are mem manmâ herone marone manbaen.

<sup>9</sup> Galalupne, nâ ulikjân kulem esenne siâ hin kulemgoân. Luâkje âmbenlupyeje hepunyekmâ aŋgâ olop hanâk hanâk manmai are gala bo katbei. <sup>10</sup> Are bâleje akmâ, me sotgâlâk nângâmbiâ humo akmap me galagât wan me wan tatyengiâp aregât nângâmbiâ humo akto munej akmâ kâmbu meyenjimai me lâpiogât nângâmbiâ humo akmap luâk are amâ hângât agak meme aregât egâlianmai yâk yengât bo magân. Luâk are hepunyekbei dân dâine amâ hân ire hepunmâ himbimân manbâi. <sup>11</sup> Hain bo magân. Nâ hingât kulemgoân. Luâk âmbâle biwinenje Yesugâlân kalion dâmai amâ luâk âmbenlupyeje egâlianngât me lâpio yengât yengonmâk me galagât hogo hogo akmai me tu kârikje nem biwi gulip akmâ bâleje akmai luâk âmbâle hainare amâ hepunyekmâ yâk olop sot bo nembei. <sup>12-13</sup> Akto luâk âmbâle Yesugât kâmolân bo manmai are amâ Anutuje konok den âiân katyekbiap aregât nâje den âiân bo katyekman. Gârâmâ ye hutyenân Yesu nângâ aŋmai yengât dosa denyenje makbiâ ârândâŋ akbiâp. Aregât luâk bâleje akmâ eweŋaet âmbenne miép are watbiâ hutyenân bo manbiap.



*Korinti gâtɲande kiapgâlân arimbiâ Paulone nângâmbô bâliɛp.*

1 Akto den siâ togombo hin nângân. Yengât hutyeɲân gâtɲe siâɲe galaɲaet dosa den mem makbiap are Yesugât kâmot yengâlân bo katmap are amâ keiɲe bo ekmâ nângâmai. Wangât Anutugât den koko luâk are yengâlân ariyi? Hain bo akbei. 2 Yesugât kâmot nenɲe sop humoân hângât luâk âmbâle Yesugât kâmolân bo manmai are den âiân katyekbaen aregât nângâi me? Wan me wan hânân yânɲe are makmâ miawakmâ keiɲe miawagâkgât makmâ den âiân katyekbaigât kârikɲe tatyɛngimap. Hain akto hângât luâk kotdâɲe yengât pat mem miawagâkgât are yengâlân bo ariwei. 3 Akto areâk bo. Nenɲe aɲelo yengât den dât owâiɲe potatbaen. Aregât nen âlepɲe hângât wan me wan den are lâuwâɲe potatbaen. 4 Akto den yânɲaet siâ siâ miawakto âmâ luâk âmbâle nângâyɛngiɛɲe amâ geɲeɲe akmap, luâk hainare yengâlân den ire potatnerâm arimbiâ bo ârândâɲ akmap. 5 Aregât yengâlân gâtɲe nângâ nângâ luâk bo tatâp me? Ye den are nângâmbiâ aɲun yeɲaet akɲetdâm kulengoân. Aregât yengâlân gâtɲe luâk nângâ nângâyɛɲe olop siâ manmap yâkgâlân mem arimbiâ makyɛngiwiap. 6 Ye âmâ hain bo akmai. Hângât kiap me kotdâ Yesugâlân gâtɲe bo areyengâlai gala olop den dosayɛɲe mem miawagâkgât arimbiâ amâ bâliâp. Dâ areâk bo. Anutu bonâɲgaɲmai yâk yengâlân mem arimbiâ âmâ dondâ bâliâp.

7 Galama, den dosayɛɲe Anutu bonâɲgaɲmai yâk yengât dewunyeɲân miawakmap arekɲe biwi kat

katyeŋe mem gemap. Aregât hin akbei. Yeŋgâlân gâtŋe siâŋe galaŋe bâleŋe agaŋdo galaŋande hanâk dâm yâkŋe âlepŋeâk agaŋbiap. Akto yeŋgâlân gâtŋe siâŋe galagât wan me wan hilip koaŋmâ gulip kombo galaŋande hanâk dâm hain bo agaŋbiap. Ye hain akmai dâine âlepŋeâk miawakbop. <sup>8</sup> Gârâmâ yeŋeâk akmâ bâlimai akto yeŋgâlân bikŋande galalupyenâet hianŋi den makyenŋimai. <sup>9</sup> O galama, agak meme hain akmai aregât keiŋe makyenŋire nâŋgâŋet. Luâk bâleŋe mem manmai are Anutuŋe ikinâet kâmolân bo dewatim katyekmap, ye aregât bo nâŋgâmai me? Ageine biwiyenŋe hianbâi gârâmâ luâk âmbâle hainare yeŋgât keiyenŋe hin makbe. Luâkŋe âmbenlupyenŋe hepun yekmai me dâp gulip manmai me lâpio yeŋgât nâŋgâmbiâ bunŋe akto manmai me luâk siânba yeŋgât nâŋgâm egâlianŋe bâleŋe manmai me luâk siânba yeŋgât dewunyenân anunŋe olowâk akmai <sup>10</sup> me kuk akmâ yeŋgum kâmbu akmai me wan me wan hârok ekmâ egâlianŋe me tu kârikŋe nem biwi gulip akmai me den hembalik makmai me puligâlâk nâŋgâm luâk bikŋe heyenŋim umburuk akyenŋimai luâk hain arekŋe amâ Anutugât manman are bo ekbai. <sup>11</sup> Akto yeŋgâlân bikŋande ulikŋân ye hain akmâ manmini. Dâ hinŋe ire âmâ Humonenŋe Yesu Kristo are akto Anutunennâet Heakŋande meyekmâ dosayenŋe pulim panmâ Yesugât kâmolân katyekbela biwi âlepŋân mandâi akto Yesuŋe dosayenŋe mem dumyenân kinmâ moep aregât Anutuŋe yekmâ dosayenŋe bo agep dâm yeŋgonlep.

*Bâleŋe membâigât minao den.*

<sup>12</sup> Galama, ye hin dâmbiâ nângân, “Wan me wan aktenje Anutuje nenekto âlepje akmap.” dâyi. Aregât makyenjiwe. Magi amâ âlepje gârâmâ kotje siâ siâ akmaen, arekje âmâ âlepje bo tân nengumap. Akto wan me wan tat nengiâp aregâlâk egâlianmâ hoj bawa aktenje panâk menenekto bâliwâen. <sup>13</sup> Aregât hin nângân. Sot amâ âlepje Anutuje sotyene dâm nengimap. Akto nembangât dâm tep nenje kalep aregât sot amâ âlepje gârâmâ siân Anutuje bâin dâm sot akto tepnenje lâuwâ lâuwâ meteyelekto bo akbiandat. Dâ hâknenje amâ wan me wan egâlianjât dâtâne bo. Are âmâ Humonenjaet damun akmap. <sup>14</sup> Akto Anutuje kârikje akmâ Humonenje mem momonânba agalep hainâk kârikje akmâ nen mem agatnenekto manmannenje irakje miawakbiap. <sup>15</sup> Akto hâkyenjande âmâ Kristogât hoj bawa aganjmai are bo nângâmai mon? Akto hâkyene âmbâle dâp gulip manmai are olop tatbiâ ârândâj akmap mon? Bo dondâ. <sup>16</sup> Aregât lâuwâne makbe. Anutuje makto Moseje hin kulemgoep, “Luâkne âmbâle mendo lâuwâne konok akmâ manbiandat.” hain kulemgoep. Aregât luâk siâne âmbâle bâlene mendo lâuwâne han biwi konok akmâ manmandat, are nângâm hengemgowe. <sup>17</sup> Dâ luâk siâne Humogâlân andâambo yâk olop han biwi konok akto nângâ nângâ konok akmandat. <sup>18</sup> Aregât luâkne âmbenlupyene hepunyekmâ hanâk hanâk âmbâle anjâ bo meyekbei. Akto luâk âmbâle bâlene akmai amâ dosa memai gârâmâ hâkyene bo mem bâliakmai. Dâ âmbâle hanâk hanâk olop manmâ ikinje hâk mem bâliakmap. <sup>19</sup> Aregât den

umatne siâkâ makyenpire nângânet. Anutune ikinæet Heak Âlepne hungunaŋdo biwiyenân miep aregât ye amâ yâkgât emet akmai. Akto ye âmâ yenæet bo. <sup>20</sup> Yesune Anutugât kugânba ikinæet gilâmne kâimbo puligoyegep, aregât ye agak memeyenande Anutu kotne konmâ mem agatbeigât hâkyene damunne akbei.

## 7

### *Luâkdâ âmbendâ yengât den.*

<sup>1</sup> Ye kulemgom katniŋbiâ togombo oyanmâ meteân aregât wan me wangât ai nuguyi aregât hin makmâ miawaktere nângânet. Luâk Yesugât kâmolân gâtŋande âmbâle bâlâk manbian dâm âmâ âlepne hain akto ârândân akbiap. <sup>2</sup> Gârâmâ egâlianġât dâp dondâ yendâpgât luâk âmbâle hanâk hanâk dâp gulip manbâi dâm âmbâleŋe luâk ambonân ambonân meyekbei. Akto luâk âkâ hainâk âmbenlupyene ikinæak ikinæak meyekbei. <sup>3-4</sup> Akto âmbâleŋe ikinæet hâkne are bo damunne aganġimap âmâ luâkŋande damunne aganġimap aregât âmbenlupyenande hâkyene luâklupyene bo gangerâ yenġiwei amâ âlepneak yenġiwei. Akto hainâk luâkne ikinæet hâkne bo damunne aganġimap amâ âmbenŋande damunne aganġimap, aregât luâklupyenande hâkyene are âmbenlupyene bo gangerâyenġiwei amâ âlepneak yenġiwei. <sup>5</sup> Aregât ye âmâ luâkdâ âmbendâ hâkyene bo gangerâ anġiwei. Gârâmâ luâk âmbâi lâuwâ siâne Anutu kârikne ulilanbaet dâm âlepne sop ainâk Anutu ulilanbiandatġât tâlâwâk hâkyetne gangerâ anġim Anutu ulilanbela nângâmbo âlepne akbiap.

Dâ ulit sopņe bo akto hamiņângen Niambiņe heyetkim bâleņe aget dâwopgât âlepņe luâkdâ âmbendâ meakbiandat. <sup>6</sup> Dâ ire makberân amâ bo makmâ hâreyengiwerân. Bo. Maktere nâņgâmbiâ bâliwopgât makyenġiân. <sup>7</sup> Nune amâ hin maktân. Luâk hârok nâņe âmbâle siâ bo meân hainâk bo akmâ manbei ġârâmâ are bo akmai. Dâ Anutuņe kârikņe ikinġeâk ikinġeâk menengimap siâņe siâņaet memap. Akto siâņe siâņaet memap areġât kârikņe a areâk yenġiep areġâlâk nâņġâm manbei.

*Luâk âmbâle sigan akto kambut yenġât den.*

<sup>8</sup> Akto luâk âmbâle sigan akto âmbâle luâklupyene moyi are yenġât amâ hin makbe. Ye nâņe âmbâle bo meân, ye hain luâk âmbâle bâlâk manbei amâ âlepņe akbiap. <sup>9</sup> ġârâmâ luâk âmbâle biwiyene kârikņe bo damunņe akmai arekņe âlepņe luâkdâ âmbendâ akmâ manbei. Akto egâliangât kâlâpņe mem bâli yekbopgât luâkdâ âmbendâ akmâ manbiâ huraguwiâp.

*Luâkdâ âmbendâ yenġât den.*

<sup>10</sup> Akto luâkdâ âmbendâ yenġât den maktere nâņġâņet. Akto ire nâņġât den a konok bo ire Humonenņande tân nugumbo maktân, âmbâle luâkdâņe luâklupyene bo hepunyekbei. <sup>11</sup> Dâ âmbâle siâ emelâk luâk hepulep areġât luâk siâ bo membiâp. Me luâkņe emelâk hepulep are olop maganġimbela âlepņe dâambo peniangiwiandat. Akto luâk âmbendâ ye amâ âmbenlupyene bo hepunyekbei.

<sup>12</sup> Dâ ye bikņe luâkdâ âmbendâ agi yenġât den ire Humonenņande bo magep amâ yân makbe. Yenġâlân ġâtņe luâk siâ hinņe Yesu

nângâ anep gârâmâ âmbenŋe âmâ Yesu bo nâŋgâ anep yâkgât hin makyenŋiwe. Âmbenlupyeŋande âlepŋe dâmbiâ âmâ âlepŋe meyekbiâ manbei aregât bo hepunyekbei. <sup>13</sup> Akto âmbâle hinŋe Yesu meyi âmâ luâklupyeŋe Yesu bo nâŋganmai yenŋât hin makyenŋiwe. Luâklupyeŋande âlepŋe dâmbiâ âmâ hanâk bo hepunyekbei. <sup>14</sup> Aregât keiŋe hin. Nan baratlupyeŋe emelâk Anutugât pat akmâ manmai aregât nan baratlupyeŋe bâliwâi dâm Anutuŋe âmbâle ekmâ nâŋgât kâmot dâmap, aregât luâkŋe bo nâŋgâniŋmap are nâŋgât kâmolân katbian dâmap. Akto luâk Yesu nâŋganmap âmbâle Yesu bo nâŋganmai are yekmâ nâŋgât kâmolân katyekbian dâmap. <sup>15</sup> Akto Anutuŋe yeukŋân gala akmâ manŋetgât nengonmap aregât luâk me âmbâle Yesu bo nâŋganmai arekŋe âmbenlupyeŋe me luâklupyeŋe hepunyekberâm âlepŋe hepun yekbai. <sup>16</sup> Gârâmâ âmbâle Yesugâlân gâtŋe arekŋe luâklupyeŋe olop manmâ makyenŋimbiâ luâklupyeŋe Yesugâlân biwiyeŋe âlepŋe katbai. Akto luâk yekâ hainâk âmbenlupyeŋe olop manmâ yaiwâk akyenŋimbiâ âmbenlupyeŋe Yesugâlân biwiyeŋe katbai, aregât bo nâŋgâmai aregât luâkdâ âmbendâ dowâk bo hepun akbai.

*Ulikŋân malion hainâk manniâm.*

<sup>17</sup> Galalupne, ye hârok hin makyenŋiwe. Nâ mendugumai emet ain hârok âgâm hin makyenŋiman. Anutuŋe ye oloŋ yekmâ ikinŋaet kâmolân katyegep sop ain ye kin kin gain gain kili. Akto Humonenŋande kin kinyeŋe gain gain yenŋiep aregâlâk nâŋgâm manbei. <sup>18</sup> Aregât ye Yuda gâtŋe ulikŋân hâkyeŋe gâiyi are Anutuŋe oloŋ yegep ye âmâ

Anutugât pat hâkyeņe gâiyi aregât tiripņe bo gulip goaņgiwei. Dâ bikņe Yudagât agak meme bo watmâ âmâ hâkyeņe bo gâiyenņiyi hain akbiâ ainâk Yesuņe oloņyegep, ye âmâ gâinenekbei hain bo nâņgâwei. <sup>19</sup> Are lâuwâņe makbe. Hâkyeņe gâi gâigât me bo gâi gâigât are Anutuņe bo ekmâ nâņgâmap. Akto yâkņe âmâ nen lauņe lokom manbaen are gâlâk nâņgâmap. Aregât hâkyeņe gâi gâigât bo nâņgâwei. <sup>20</sup> Galama ye kin kinyeņe ain me ain kinbiâ Yesuņe yeņgonlep kin kin ainâk kinbei. <sup>21</sup> Dâ hoņ bawa âi membiâ yeņgonlep are nâņgâmâk bo akbiâ âmâ kambiamyeņe umatņe bo akbiap. Gârâmâ damunlupyeņe âlepņe arinjet dâmbiâ âmâ ainâk hoņ bawa agaņmai arewa sopanmâ yeņgât manmanyeņe yeâkgât damunņe akbei. <sup>22</sup> Dâ aregât siâkâ makbe. Ye hoņ bawa âi manmai are Humonenņande yeņgonlep aregât yeņe luâk me siâ siâ hoņ bawa bo akyeņgimaen dâm heroņe akbei. Dâ yeņe siâ hoņ bawa bo agaņgimai are Humonenņe yeņgonlep aregât Kristo hoņ bawa agaņmai. <sup>23</sup> Yesuņe Anutugât kugânba yeņgât dумыeņân kinmâ puligoyegep aregât Humogâlâk nâņgâm luâk yeņaet bo nâņgâ aņgiwei. Amâ Kristo konok nâņgâ aņbei. <sup>24</sup> Hain akmâ ulikņân Humonenņe oloņ yegewân gain mali, a hainâk mem manmâ sop hinņe âkâ kinmâ Anutugâlân dewatiwei.

*Luâk âmbâle sigan yeņgât den.*

<sup>25</sup> Akto ye sigan yeņgât hin makyenņire nâņgâņet. Humonenņande bo makniņep âmâ nunak maktân aregât Anutu lumbe Amboņe arekņe nâņgâ niņdo ârândâņ akmap aregât nâņgât den tângomap.

<sup>26</sup> Sop hinņe dâtņe metņe dondâ miawaktâpgât ye luâkdâ âmbendâ manmai me sigan manmai hainâk manmâ âgâwei. <sup>27</sup> Aregât yeņgâlân bikņe luâk âmbendâ emelâk agi ye âmbenlupyenņe bo hepunyekbei. Dâ luâk sigan manmai yeņe âmbâlegât bo makbei. <sup>28</sup> Dâ âmbâle memberâm akmâ membiâ bo bâliwiap. Akto âmbâle sigan hainâk luâk mendo bo bâliwiap. Akto hain arekņe hângât umatņe miawakyenņiwopgât hain kulengoân. <sup>29</sup> Galalupne, umatņe dondâ miawak yeņgiwiapgât sop tâlâwâk aktâp aregât âmbenlupyenņe olop mandâiņe âmbenlupyenņe aregâlânâk bo nâņgâm manbei. <sup>30-31</sup> Akto hânân âlepņe manmai ire bo akbiap aregât indemaiņe inde bâlâk manmai hain are akbei. Heroņe maroņe akmaiņe manmâ hero maro bâlâk manmai hainare akbei. Akto siâ siâ mem anġim nene manmaiņe âmâ imâ nengât bunņe borâm manbei. Akto hân iregât tiripņe bo akbiapgât hângât wan me wan mem manmaiņe âmâ ire nâņgâenņe humo akbop dâm aregât nâņgâmbiâ gewiâp.

<sup>32</sup> O Galalupne, biwiyenņe umatņe akbop dâm maktân. Akto luâk âmbâle bâlâkņe Humonenņaet âiņaet nâņgâmâk akmai hain akmâ Humonenņande nenekto ârândân agâk dâmai. <sup>33</sup> Dâ luâk âmbendâyeņe âmâ hângât nâņgâm hanoko akmai. Akto âmbenlupyenņande nâņgâyenņimbiâ heroņe âlepņe agâkgât manmai. Hain akmâ Humonenņaet me âmbenlupnenņe yeņgât ukenņe akne dâm han lâuwâ akmâ manmai. <sup>34</sup> Akto âmbâi sigan yâkâ hainâk Humonenņaet âiņaet nâņgâmâk akmai. Akto han biwiyenņe Yesugât



dâtâņe agâkgât nâņgâmai. Dâ âmbâle luâkdâņe âmâ hângât nâņganmai. Akto luâklupyene yengât nâņgâyengimbiâ herone ârândâņ agâkgât nâņgâmai. <sup>35</sup> Ye hârok âlepņe manņetgât dâm den are makyenġiân. Dâ ye hin me hain akņet dâm wârakmâ hâwâtyekbegât hain bo makyenġiân. Ye hanâk hanâk bo manmâ âmâ biwi kambiamyene mendugumbiâ Humogâlân lâwindâk kilâkgât maktân.

<sup>36</sup> Akto ewe siâņe baratne âmbâi sigan tat tatņe akbop dâm âlepņe luâk siâ waņdo mendo bo bâliwiap. <sup>37</sup> Dâ luâk ewe siâņe nâņgâ nâņgâ kârikņe tatmap yâkņe baratne yân tatbiap dâm nâņgâambo âmâ ârândâņ akbiâp. Akto owâim hain makmâ kârikņe ketugumbo ârândâņ akbiâp. <sup>38</sup> Haingât luâk siâ baratņe luâgân kato âlepņe akbiap. Dâ siâņe baratne siganâk malâk dâm gangerâambo âmâ ârândâņ akmâ heņgemgowiap.

### *Kambut yengât den.*

<sup>39</sup> Akto ye âmbâle luâkdâ hin makyenġire nâņgâņet. Ye luâklupyene olop manmâ âgâm bo hepunakbei. Dâ luâklupyene mombiâ âmâ âlepņe luâk siâ Humonenņande meyegi aregâlân gâtņe luâk siâ ukenņe nâņgâm memberâm âmâ âlepņe membei. <sup>40</sup> Dâ luâk bâlâk yân manbian dâm manbai aregât agak meme bikņe âlepņe ewangiyekbiap. Hain akto herone akbai, hain nâņgân. Ire nune den. Dâ Anutugât Heakņande tân nugumbo maktân.

## 8

*Lâpio yengât sotgât hanokoakmâ mali aregât den.*

<sup>1</sup> Akto Korinti kepiã manmâ Yesu bo nãngãmai yãkñe sot songo lâpio yengât enemyenãn katmã om nem bikñe añgim neneãn katmai ye are nãngãmbiã han lâuwã agep are nãngãn. Aregât hin makbe. Yengât bikñande hin dãmã, “Nen keñe nãngã nãngãrã humo manden aregât hanãk wan me wan mendenne årãndãn akmap.” Ye hain dãmbiã are nãngãre bunñe akto gãrãmã nãngã nãngãgãt keñe âmã kotyeñe mem agat agat miawakmap. Dã okot âlep akyengim manbiã âmã kambiamyeñe kãrikñe ketugumap. <sup>2</sup> Aregât yengãlãn gãtñe siã nãngã nãngãne emelãk humo aktãp dãmap âmã yãkgãt nãngã nãngãne bunñe bo yemap. <sup>3</sup> Dã yengãlãn gãtñe siã âmã Anutu okot âlep agañbiãp yãk âmã Anutunñe nãngãm hengemgoañbiãp. <sup>4</sup> Lãpiogãt sot songogãt âmã hin nãngãmai. Lãpio âmã siã me siã yãnñe bunñe bo. Anutu konok amã bunñe. <sup>5</sup> Kembulupñe himbimãn mandãi me hãnãn mandãi amã yem ariãi aktãp. <sup>6</sup> Dã nen âmã Anutu Ewenenñe konok mannengimãp. Yãkgãlãnba siã me siã miawak-nengimãp. Akto nen yãkgãlãn manden. Hain akmã Kambu konok Yesu Křisto yãkgãt bãtñãnba siã me siã hãrok miawagep akto nen manmã metien. <sup>7</sup> Gãrãmã nengãlãn gãtñe bikñe aregât keñe hain âlepñe bo nãngãm hengemgomãi, akto hain arekñe ulikñãn lâpio bunñe dãm mali, yãk hinñe Yesu nãngañmãn âmã sot hain are nem

âmâ biwiyenê kâriknê bo aregât lâpio areknê biwiyenê mem helen ketugumbo umatnê akmâp. <sup>8</sup> Akto Anutunê sotgât akmâ bo nângâ nengimbo âlepñe akbiap. Aregât sot lâpio yengâlânba are nendenñe Anutunê bo nângâm mem agatnengiwiap. Me bo nendenñe nângâm bo mem ge kat nenekbiap. <sup>9</sup> Gârâmâ yengâlân gâtñe, “Wei are emelâk nângân hanâk hanâk nendenñe ârândân akbiap.” dâmai ye âmâ hin akbei. Galalupyenê biwi getegâk Yesugâlân kali areyengât biwiyenê gulip akyengiwopgât nângâm herngemgowej. Akto sot nemberâm âmâ galalupyenê are yengât ukenñe nângâyengiwiei. <sup>10</sup> Aregât bikñe makbe. Ye biwiyenê kâriknê ya maktân hamianmâ panmâ hanâk lâpio emetñân âgâm sumbe nem tatbiâ galayenê siâ biwinê kâriknê bo areknê yekto, “Wei, nâkai âgâm nendere âlepñe akberâp.” dâm âgâm nem tato haminân biwinê bâlimbo dosa akbiap amâ hâuñe amâ yengâlân miawakbiap. <sup>11</sup> Amâ ye hanâk nângâ nângânennê kâriknê aktâp dâmai, aregât galayenê Kristonê yâkgât dumñân kinmâ moep areknê yekmâ âgâm mem nendo bâliwiap. Dosa are amâ yengâlân. <sup>12</sup> Ye hain akbiâ bâlenê dondâ akbiap. Amâ ye hain akmâ galayenê biwinê getegâk kalep are mem bâlimbiâ biwinê gulip akbiap. Aregât dosa amâ yengâlân. Dâ areâk bo. Ye hain akbiâ âmâ Kristogât kotñe bâliwiap âmâ dosa amâ yengâlân miawakbiap. <sup>13</sup> Aregât nâ sumbe nendere galanande aregât nekto biwinê bâliwopgât aregât nângâmâk akmâ lâpiogât sot bo nem manmâ mombian. Akto sumbe borâm yân manmâ mombian. Aregât ye hain akbei.

## 9

*Aposolo yengât keiyenje.*

<sup>1</sup> Galalupne, yeŋe nâ hâkne tunbaigât dop bo tatâp. Aregât keiŋe hin. Nâ Aposolo Humonenŋe Yesu are egân aregât wan me wan ektere bunŋe akmap. Akto areâk bo. Niŋande pup pup den pat âlepŋe makyenŋimbo biwiyenje Humonenŋaelân katmâ manmâ ya miawaktâi? Amâ nâ. <sup>2</sup> Akto siânba bikŋande, “Paulo amâ luâk yânŋe aposolo bo.” dâyi. Den are nânŋâm bo hanokoakman. Akto nânŋâm âmâ nâ Aposologât âi mem mandere ye Humonenŋaelân dewatiyi are nânŋâm henŋemgom luâk aregât den bo nânŋâwei. <sup>3</sup> Luâk Paulogât keiŋe ekne dâmbiâ kotne bâliwop dâm den hâuŋe âmâ hin makyenŋire nânŋâŋet. <sup>4</sup> Nâ Aposolo âi mem mandere hâuŋe niŋbiâ ârândâŋ aktâp. Gârâmâ hain bo akman. <sup>5</sup> Akto Aposolo bikŋe akto Yesugât emilupŋe akto Petoro yâk âmbenlupyenje olop âiân arimai. Akto âmbenne tatniŋdâp dâine yâk olop arire ârândâŋ akbop. <sup>6</sup> Akto areâk bo. Aposolo bikŋande ulityenŋimai are ârândâŋ akmap. Dâ nâ akto Banaba netkâ hain ulityenŋietŋe dâine ârândâŋ akbop. Gârâmâ netŋe umat yenŋiwâet dâm bo ulityenŋim âmâ âi mendenŋe net wan ketuguyiot are hâukombiâ netgât sot hâukoyiot. <sup>7</sup> Aregât den dopŋe hin. Tembe loko âi mem arimai damunlupyenŋande hâuŋe yenŋimai. Akto kalam amboŋe âi mem mando sot âlimbo bikŋe nemap. Akto makao damunŋe âi mem manmâ bikŋe nemap. Aregât Aposologât âi mem manman aregât hâuŋaet ulityenŋiman dâine ârândâŋ akbop. <sup>8</sup> Are amâ luâkgât nânŋâ nânŋâŋe bo

tân nugumbo maktân. Anutugât den kulemgoyi arekne hain dâmap are nângâm hain kulemgoân. <sup>9</sup> Den kârikne hainâk miawaktâp âmâ hin. Anutune makto Mosene kulemgoep bikne hin tatâp, “Bulimakaone ai mem mando ainâk sot nem-bop dâm laune bo dâgâm gisapkowei.” hain yendâp. Den are Anutune bulimakao yengât konok nângâm bo magep. <sup>10</sup> Anutune nengât hain magep. Luâk siâne ai kâmet kâmet are yân bo akmap. Sop siân sot bunne miawakbiap aregât ukenne nângâm akmap. Akto luâk siâ sot pitim mendugum katmap are âkâ hainâk bunne membian dâm akmap. Anutune aregât hain makto Mosene kulemgoep. <sup>11</sup> Aregât nen yengâlân biwigât ai siâ siâ mem hejgemgoyegiongât hâune yengâlânba hângât siâ siâ menegât nângâenne ârândân akmap. <sup>12</sup> Dâ nen âmâ hain bo nângâmaen. Akto yengâlân gâtne makyengimai are yengât biknande ulit yengimai. Dâ nen âmâ ewangi yekmaen aregât ulit yengiennne âmâ ârândân dondâ akbop. Dâ âmâ hain bo akmaen. Dâ bo ulit yengimaen arekne agak meme bikne ewangimap. Aregât siâkâ makbe. Kristogât den pat âlepne bâliwop dâm yengâlânba sot me puli me wan me wan menegât mak makne are menegât nângâm dâm bo ulityengimaen.

<sup>13</sup> Akto luâk sumbe opmânân ai memai yâk âmâ sumbe bikne memai. Akto luâk siâ alatan sumbe ogo yâk âmâ alatagât siâ siâ bikne memai, are emelâk nângâi. Aregât nângâm hejgemgowei. <sup>14</sup> Haingât Humonnenne nengât hin dâep, “Nângât den pat âlepne makmai are bâlâk manbâigât ai

mem manbiâ den nângâwerâm mendugum kinmai arekne hâuñe yeñgiwei.” <sup>15</sup> Dâ nâmâ dâp are watman dâine ârândân akbop. Gârâmâ nâmâ dâp are bo watman. Amâ ye aregât âlepñe akniññetgât nângâm âmâ ire bo kulengoân. Bo dondâ. Nângât heronje bo akbopgât luâk siâne siâ me siâne mopñe nugumbo mombian are âlepñe dân. <sup>16-17</sup> Akto den pat âlepñe makyenñiman âi are nângât kakñân kali aten. Dâ âi aregâlâk nângâm manman dâine manmâ hâuñe membom. Akto Anutuñe âi ire niñmâ huñgun niñep are nune hangât bo meân. Hain akman dâine âi are bo mendere âmâ yei, umatñe bâleñe miawak niñbop. Aregât hâuñe bo ulit yeñgim sot wan bâlâk manman, aregât nângâm heronje akman. Mombian are âlepñe dân. <sup>18</sup> Akto nâ hâuñe wan meman? Hin. Âi meman aregât hâuñe niñbiâ ârândân akmap gârâmâ hanâk hâuñe are bo niññet dâm yân hâuñe bâlâk arim makyenñiman. Aregât biwine heronje akmap.

*Paulo luâk keñje keñje are yeñgât hoñ malep.*

<sup>19</sup> Akto siânbanje nângât maganñi niñbiâ nângâm hanâk dâre umatñe bo akmap. Nâ luâk hârok yeñgât hoñ bawa bo manman yeñgât hanâk hoñ bawayeñe agân. Are luâk âmbâle dondâ den pat âlepñe nângâm Yesugâlân dewatim manñetgât nângâm agân. <sup>20</sup> Aregât Yuda luâk âmbâle âlepñe akñet dâm Yuda agak meme watmâ makyenñiman. Akto den kârikñaet hoñ bawa manmai yeñgâlân manmâ luâk âmbâle ire âlepñe akñet dâm hainâk den kârikñaet hoñ bawa agân. Dâ nunak den kârikñe lokore Anutuñe nekto huraguâkgât bo malân. <sup>21</sup> Luâk âmbâle den kârikñe bo nângâmai

are yengâlân arim manmâ luâk âmbâle ire âlepne aknet dâm hainâk den kârikne bo nângâmai are hainâk agân. Dâ nunak âmâ Anutuñe Kristogât den kârikne katniñdo are mem mandân. <sup>22</sup> Akto luâk âmbâle yeukne manmai yâk yengât bikñande Yesu nângañjetgât dâm hainâk yeukne agân. Akto luâk âmbâle keiñe keiñe siâ siâ Anutuñe heñgemgo yegâkgât dâp siâ siâ mem yâk hainâk akmâ âi mem manmâ yu gan. <sup>23</sup> Siâ siâ hârok are yân bo. Yesugât kot patne miawakmâ ariâkgât akman. Akto nunak âkâ aregât hâuñe memberâm akman.

*Paulo kârikne akmâ pârigiep.*

<sup>24</sup> Akto aregât den ginñe makbe. Dop agakñân luâkne wan me wan katbiâ tato memberâm pârigimai. Akto wan me wan amâ konokne wârakmapne togom memap. Akto ye dop hainâk hâuñe wan me wan memberâm âi humo membei. <sup>25</sup> Akto luâk yâkne âmâ kârikne akberâm ukenjaet bo nângâm hâkyeñe heñgem agum hâuñe memberâm âi humo memai. Dâ hâuñe are amâ buluñe yânjaet dowâk dipkomap aregâlâk nângâm pârigimai. Akto nen âmâ pârigim arimaen nângâ nângânenñe yeukne akbop dâm damunñe akmaen. Akto nenñe hâuñe kârikne membaen. <sup>26</sup> Aregât nâ nunak gai pirâman. Hain akmâ horat kat katñe a tiñ tiñâk ekmâ kinmâ pirâman. Nâ soñ soñ are dâp pâñân gulip bo panman. <sup>27</sup> Bo. Nune yânñe akbomgât hâk biwine mem geakmâ damunne akman. Amâ bikne makyenjiân aregât hâu bâlâk manbomgât.

# 10

## *Yuda yengât den pat.*

<sup>1</sup> Galama, Yuda nengât hakulupnenne siâ me siâ mem mali aregât keiŋe nelâmyengiwoŋgât makyengire nângânet. Anutuŋe yâk yeŋe hârokgât damuŋeŋe akto aregât hamandatŋe dâp hekat yeŋgimbo arim haru hâtikoyi. <sup>2</sup> Akto areâk bo. Anutuŋe makto Moseŋe damuŋeŋe akto siâ siâ âlepŋe hamandatgât pat akto harugât pat miawakyengiep. <sup>3</sup> Akto Anutuŋe sot akto tu yeŋgimbo hârokŋe neyi. <sup>4</sup> Akto tu aregât keiŋe hin, Anutuŋe bâgilupnenne kât siâ hekat yeŋgimbo kât kâlegenba tu gembo neyi dop hainâk Anutuŋe Kristo huŋgunaŋdo hamiyeŋân arimbo yâkgâlânba kârikŋe gembo meyi. <sup>5</sup> Akto Anutuŋe bâgilupnenne bikŋe agak memeyeŋaet nângâm bâlimbo hân yânŋân mom meteyi. <sup>6</sup> Yâk yeŋgâlân are miawagep kulem arekŋe nengât den minao aktâp. Akto nen yâk bâleŋaet okot tuk tuk agi hainâk akbâengât den are tatâp. <sup>7</sup> Anutugât denŋande hin dâmap, “Luâk âmbâle lâpio yeŋgât meteyeŋân sot om nem kep mem bâleŋe agi.” aregât ye nângâm heŋgemgom hain bo akbei. <sup>8</sup> Akto yâk yeŋgâlân gâtŋe bikŋe egâlian bâleŋe akmâ luâk âmbâle hanâk hanâk mem hepun akmâ bâleŋe agi aregât Anutuŋe yeŋgumbo kâmot humo 23 tausen moyi. Nen hain akbâengât den are oyaŋmâ hamewakmâ âmâ nen hain bo akbaen. <sup>9</sup> Akto yâk yeŋgâlânba siânbaŋe Humonennjaet dewunŋân âgâ âgâŋe keiŋe keiŋe akberâmbiâ dop yeŋguep. Aregât mulumŋe yeŋgimbiâ moyi. Nen hainâk Anutu dop kom bâlewâengât den are



oayanmâ hamep akmâ hain bo akbaen. <sup>10</sup> Wan me wan Anutuŋe yeŋgimbo ekbiâ giep. Akto yâk yeŋgâlânba bikŋande, “Anutuŋe bo damun nenŋe akto âmâ lâpio kotŋe mem agatne.” dâmbiâ âmâ mem bâli bâli aŋeloŋe mem bâliyekmâ metiep. Aregât nen hain henengiwoŋp dâm den are oayanmâ hamep akmâ hain bo akbaen. <sup>11</sup> Yâk yeŋgâlânba siâ siâ miawagep arekŋe ye hain akbâi dâm dop kalep. Akto hân purik âgâwiapgât sop ewumâk manden nengât Mosenje den minao ire kulengoep. <sup>12</sup> Aregât yeŋgâlân gâtŋe bikŋe nen âlepŋe bâleŋe bo akbaen dâm âmâ bâleŋe akbâigât han biwiyenje damunŋe akmâ heŋgemgom manmâ âgâwei. <sup>13</sup> Akto yeŋgâlân dopko dopko miawakmâ togomap are luâk hârok nengâlân miawakmap. Gârâmâ Anutuŋe nengât akmâ manmap yâkŋe biwiyenje ekmâ biwi yeŋaet kârikŋe bo akbop dâm dopko dopko miawak yeŋgimboân ainâk biwiyenje kârikŋe ketugumap, âlepŋe manbaigât dâp tatyenŋiâp. <sup>14</sup> Aregât akmâ lâpio kotŋe mem agat agatgât are hepunbei.

*Kembugât sot nem gaetŋe lâpiogât sot bo nem-baen.*

<sup>15</sup> Galalupne, ye nâŋgâ nâŋgâ olop mandâi aregât den ire maktere yeŋak nâŋgâm ekŋet. <sup>16</sup> Hâpuân waiŋ kâim yeŋgimaen are Anutuŋe ekmâ âlepŋe dâmap. Aregât Anutu okot âlepgât mepaiŋe mem maŋganmâ aŋgim nemaen. Aregât mendugum kinmâ Kristogât gilâmŋe nengât kâiep dâm nâŋgâm heŋgemgomaen. Akto okot âlepgât maŋganmâ aŋgim akmâ sot mem munditmâ nem Kristo olop kâmot konok akmaen aregât

mindugum kinmaenân Kristo nengât dâm hâkņe yengimbo mem bâliyi are nâņgâm heņgemgomaen. <sup>17</sup> Sot koaņe konok aņgim akmaen aregât bunņe nen luâk âmbâle dondâņe gala kâmot konok akmaen. <sup>18</sup> Akto ye Yuda luâk agak meme memai are nâņgâm heņgemgoņet. Sumbe katmâ ombiâ ondo nembiaâ âmâ ainâk Anutuņe meme wâtņe akyengimbo kâmot konok akmai. <sup>19</sup> Gârâmâ den yu kulengoân aregât keņe hin. Luâk âmbâle lâpiogât sumbe omai arekņe âlepņe bo aktâp. Akto lâpio are âkâ bunņe bo aktâp. <sup>20</sup> Gârâmâ luâk âmbâle Anutugât bo nâņgaņmaiņe lâpiogât sumbe omai are amâ sinduk baniara bâleņeet nâņgaņmâ omai. Aregât nâ yengât hin maktân. Ye sinduk baniara bâleņe are yengât bonâņgâ yengiwai. Amâ sinduk baniara olop kâmot konok akbâigât. <sup>21</sup> Ye mendugum emet siân âgâm Humoņe nengât moep nâņgâm aregât sot tu nem metem âmâ ainba gain gain arim sinduk baniara bâleņe olop menduguwai? Hain bo akņet. Ye Humogât sot kat kat ainba sot nem manmâ âmâ ainba sinduk baniara yengât kat kalânba sot nembiaâ âmâ bâleņe dondâ akmap. <sup>22</sup> Ye sinduk baniara areyengât nâņgâmbiâ humo akto âmâ Humoņe nâņgâ yengimbo bâleņe akmap. Are miawagâkgât hain meyi mon? Nengât kârikņenennande âmâ Anutugât kârikņeņe ewangimap dâmai mon?

*Wan me wan hârokņe amâ bo tân nengumap.*

<sup>23</sup> Akto ye hin dâmbiâ nâņgân. Kotņe siâ siâ hârok tatnengimap are mem mandenņe ârândâņ akmap dâyi. Aregât makyenģiwe. Bundâk magi. Gârâmâ kotņe siâ siâ hârok tatyengimap arekņe

âmâ âlepņe bo tânyengumap. Akto biwiyene bo mem kârikņe ketugumap. <sup>24</sup> Aregât ye yeņaet bo nâņgâm âmâ galalupyene yengât nâņgâ aņgiwei. <sup>25</sup> Han lâuwâ akbâigât ye kâmolân sonņo puligowerâm nâņgâm hanâk puligom om nembei. Akto sot ire yânņe me lâpio dewun yeņânba togoâp hanâk om nembe dâm makmâ nâņgâmâk bo akbei. Akto hanokoak bo akbei. <sup>26</sup> Amâ hingât. Hân ire amâ Humonennaet aktâp. Akto wan me wan hânân yendâp akai Humonennaet aktâp. <sup>27</sup> Dâ luâk âmbâle Anutu bo nâņgâ aņmaiņe yengâlân gâtņe siâņe yengondo emetņân âgâmbiâ sot sonņo om yengimbo nâņgâmâk bo akmâ hanâk nembei. Akto ai pei bo agañbei. <sup>28</sup> Gârâmâ siâņe sonņo ire lâpio yengât sumbe dâmbo âmâ luâk aregât nâņgâmâk akmâ borâwei. Are nembâ luâk makyengimbo aregât biwiņe bâliwop dâm bo nembei. <sup>29</sup> Luâk aregât biwiņe bâlewop dâm hain akbei. Dâ biwige amâ âlepņe agâk. Aregât hin makbei. Nâ wan me wan nendere biwine ârândâņ akmap aregât luâk siâņe nâņgât nâņgâniņdo wangât bo bâlimap. <sup>30</sup> Akto nâ Anutuņe han kalemņaet niņepgât akmâ mepai meanmâ sot nendere wangât siâņe nâņgâm bâliniņdâp? <sup>31</sup> Gârâmâ hin akbei. Ye sot sonņo nemberâm me wan me wan akberâm Anutu okot âlep agañmâ kotņe mem agatmâ mepaiņe membei. <sup>32-33</sup> Akto nâ luâk keiņe keiņe arekņe nekbiâ âlepņe agâkgât neman. Dâ nunaet siâ siâ âlepņe akmangât bo nâņgâm luâk âmbâle dondâ den pat âlepņe nâņgâmbiâ Anutuņe heņgemgoyekbiap dâm luâk âmbâle siâ siâgât ukenyene meman. Akto ye hainâk Yuda luâk me Girik luâk bikņe akto

Anutugât luâk âmbâle yengât dewunyenân dosa bâlâk manbiâ yekbiâ bo bâliwiapgât yâk yengât nângâyengiwei.

## 11

### *Luâk âmbâle keinenje.*

<sup>1</sup> Galalupne, nâ Kristo wan me wan miep are hainâk meman aregât ye hainâk nângât agak memene watbei. <sup>2</sup> Ye nâ wan me wan agân are nângâm makmâ hâre hârenaet den are watmâ mali are nângâre âlepje aktâp. <sup>3</sup> Dâ ire siâ maktere nângânet. Anutu âmâ Kristogât Kautje akto Kristo âmâ luâk nengât Kautnenje akto luâk amâ âmbâle yengât kautlupyeje. <sup>4</sup> Aregât luâk siâ sângumje kautje tigim kinmâ Anutu ulilanbiap me Anutugât den dât makmâ miawakbiap amâ kautje anjun meanbiap. <sup>5</sup> Me âmbâle siâ sângumje kautje bo tigim kinmâ Anutu ulilanbiap me Anutugât den dât makmâ miawakbiap are âkâ hainâk kautje anjun meanbiap. Akto âmbâle gulip manmai olop are dopyeje konogâk aktâp. <sup>6</sup> Aregât keije amâ hin. Âmbâle siâ Anutu ulilanberâm kautje bo tigim kinmâ hâkne mem agatmap aregât yeje âmbâle bâleje siâ kautje dumutje hârem anditmai aregât âmbâle are anjun angiâkgât kautje dumutje hârem anditbai. Dâ âmbâle hain arekne anjun anjim âmâ benje âlepje kautje tigim manbiap. <sup>7</sup> Luâk âmâ kautje bo tigim manbiâp. Yâk Anutugât tirip akto Anutuje ikiye kârikje miawagâkgât mânginenegep. Dâ âmbâle amâ luâkgât pagaleje ulikje. <sup>8</sup> Luâk amâ âmbâle gâlânba ulikjân bo miawagep. Amâ âmbâleje luâk gâlânba

miawagep. <sup>9</sup> Akto Anutuņe luâk âmbâlegât akmâ manbiapgât bo mângiep. Bo. Amâ âmbâleņe luâk tângom manbiapgât mângiep. <sup>10</sup> Aregât âmbâleņe luâkgât amukņân mandâpgât sângumņe kautņe tigiangim manbiâp. Amâ yân mando Aņeloņe ekbiâ bâliwopgât. <sup>11</sup> Aregât hanâk luâk ikiņeâk ikiņeâk manmâ âgâwai me âmbâle ikiņeâk ikiņeâk manmâ âgâwai aregât Kembuņe âmâ bo makmâ hâriep. <sup>12</sup> Gârâmâ Anutuņe luâk mem âmbâle ketuguep. Dâ hinņe âmbâle memelupnenņe yeņgâlânba luâk miawakmaen. Akto siâ siâ are hârok Anutugâlânba miawagion. <sup>13</sup> Aregât ye yeņeâk den are mem nâņgâm heņgemgom potatbei. Âmbâleņe kautņe bo tigiakmâ Anutu ulilaņbiap are âmâ agak meme âlepņe me gain? Bo. <sup>14</sup> Aregât keiņe hin. Luâk âmbâle nengât agak meme âmâ hekat yeņgimâp. Amâ benņe hin luâk siâ dumutņe kâlep are âmâ bo huraguâp. <sup>15</sup> Dâ Anutuņe tigiakņet dâm âmbâle dumutyene kâkâlep yeņgiep are âmbâle dumutyene kâkâlep are âmâ âlepņe. <sup>16</sup> Akto luâk siâņe iregât denņe borâm hâkâņ akmâ kuk akbiap âmâ yâk âkâ hin nâņgâm heņgemgowiap. Anutugât kâmotlupņe aposolo nen âmâ âmbâle kautyene tigiangim manbei dâm manmaen.

*Kembugât sot hilipkoyi.*

<sup>17</sup> Akto den siâ hin. Ye mendugum kinbiâ agak meme âlepņe bikņeâk miawakmap. Dâ agak meme bâleņande dondâ miawakmap. Are nâņgâre bâliâp. <sup>18</sup> Akto yekâ agak meme hin akbei. Yeņeâk miti emetņân âgâm hârem potalakmai. Nâ den iregât bunņe me gain dâm bikņe nâņgân. <sup>19</sup> Akto ye hain akbiâ âmâ hâmbâi luâk âmbâle bikņe

agak meme âlepñân manmai are tektekñân miawakbiâ yekbai. Are miawagâk dâm hâreakmâ awam mewam akmai are yengâlân miawaktâp. <sup>20-21</sup> Akto yengât agak meme hin nângân. Ye mendugum kinmâ konok konok hârogâk dowâk yeñaet sot areâk nemai. Hain akbiâ bikñe âmâ mop yeñe aguep. Dâ bikñe âmâ tu kârikñe dondâ nem biwi gulip akmai. Aregât ye Humonennaet sot bo nembai. Bo. <sup>22</sup> Ye sotgât nângâm âmâ benñe emetyeñân tatmâ ain sot tu nembei. Agak memeyeñe nângâm hin dân. Yeñe âmâ Yesugât kâmot yengât nângâmbiâ yânñe akto galalupyene sot bo tatyengimap are bikñe bo yengimai are âmâ yengimbiâ anun meyeñimai. Nâ yengât gain gain makbe? Nâñe hanâk yengât kotyene mem agat-bian me bo? Bo, agak meme akmai are nângâre kambiamne bâliep.

### *Kembugât sotgât den.*

<sup>23</sup> Akto Humonenñande sot aregât keñe hekat niñdo emelâk makyenjiân are lâuwâñe makbe. Hândâkñân Yudasi Yesu gasalupñaelân katberâm agep sop ain Yesu Humonenñe sot mem <sup>24</sup> Anutu âlepñe dâm mepaiñe mem maganmâ munditmâ hin dêp, “Nunaelân dop katmâ makyengire nângâñet. Nângât pat nelâm yengiwopgât sot ire nem manbei.” <sup>25</sup> Hain dâambo nembia bo akto waiñ hâpurâ siâ mem hin makyengiep, “Waiñ irekñe Anutugât dâp irakñe miawakbiapgât nugumbiâ gilâmne gewerâp aregât dopñe aktâp are nelâm yengiwopgât tu ire nem manmâ âgâwei.” dêp. <sup>26</sup> Ainba âmâ Humo moep aregât den pat makmâ âgâwei ye sot tu nem akmâ âgâm

manbiâ Humonenne togowiap. <sup>27</sup> Hain gârâmâ luâk âmbâle siâne kotne hanâk hanâk akmâ tu sot are nemiap amâ Humonenjaet gilâmne kâim hâkne yengimbo kombiâ moep are hâkân akmâ mando dosa miawaganbiap. <sup>28</sup> Aregât dosa Anutune kondo bâlene humo miawaganbiap aregât ye nem kinbaiân ainâk biwiyene ekbei. Biwiyene ekbiâ ârândân akto ainâk âgâm sot tu nembei. <sup>29</sup> Luâk siâ Kembangât sot bunne bo ekmâ nânnganmâ hejngemgom nemiap yâk âmâ dosa membiap. <sup>30</sup> Dâ yengâlân gâtne hanâk hanâk agi aregât kundat mem miawakmâ bikne mom meteyi. <sup>31</sup> Gârâmâ nen biwinenne mem potatmâ hejngemgoyion dâine Humonenjande umatne ire bo nengimbo miawakbop. <sup>32</sup> Dâ Humonenjande umatne ire nengiep aregât hin nânngâmaen, “Humonenjande biwinenne orem miwindik nengiepgât hain agep.” dâmaen aregât siân hângât luâk âmbâle denân hâkyene tunbiap ainâk nen tunbop. <sup>33</sup> Hain gârâmâ Anutugât sot nenegât mindugum bikne yengât âkâ lâmyengumbiâ togom metembiâ nembei. <sup>34</sup> Akto mindugumbiâ gulip akto Anutune hâune yengiwopgât hin akbei. Yengâlân gâtne bikjande sotgât mopne agumbo âmâ ulikjân yeje emelan nembai. Gârâmâ den bikne amâ nunak togomân âmâ makmâ hejngemyenguwian.

## 12

### *Heakne âi memap.*

<sup>1</sup> O Galalupne, Anutugât Heakne yâkne âigât wan me wan nengimap, aregât pâpkowâi dâm

makyeŋgiwe. <sup>2</sup> Ye nâŋgâi. Ulikŋân bâleŋe ambolupŋande siâ me siâ lâpio den bo makmai yeŋgâlân oloŋ yekbiâ yekâ lâpio yeŋgât nâŋgâmbiâ bunŋe agep. <sup>3</sup> Akto siâŋe Yesu bâleŋande kondo bo akbiap dâmbô âmâ Anutugât Heakŋande kautŋân bo memap. Dâ luâk siâŋe Yesu amâ Humonenŋe dâmbô âmâ Anutugât Heakŋande kautŋân mendâp are nâŋgâm heŋgemgowe.

<sup>4</sup> Akto Anutugât Heakŋe konogâk tatâp gârâmâ kautnenŋân mem okot âlepgât nengimbo kulem kotŋe hârok miawak nengimap. <sup>5</sup> Dop hainâk âi wan me wan dondâ tatnengiâp gârâmâ Humonenŋe konogâk tato hoŋ bawa agaŋmaen. <sup>6</sup> Hainâk Anutuŋe konok âi kotŋe hârok nengimbo âi are âlepŋe kenuŋmaen. <sup>7</sup> Aregât keiŋe hin. Anutuŋe Yesugât kâmot hârok âlepŋe manbai dâm ikinjaet Heakŋe huŋgunaŋdo nen tânaguwaengât konok konok meme aknengimbo âi siâ mem kârikŋe kenuŋmaen. <sup>8</sup> Aregât nengâlân gâtŋe siâ Anutugât Heakŋande meme agaŋdo den bunŋe makyeŋgimap. Dâ nengâlân gâtŋe siâ âmâ memene agaŋdo nâŋgâ nâŋgâ âlepŋe nâŋgâm manmap. Gârâmâ Heak konogât. <sup>9</sup> Heak kârikŋe arekŋeak agaŋdo han biwiyene Yesu nâŋgaŋmâ kârikŋeâk katmâ manbai. Dâ Heak Kârikŋe arekŋeak luâk siâ agaŋdo diwirâ kundatdâ makto âlepŋe akbai. <sup>10</sup> Dâ siâŋe âmâ kulem memap. Dâ siâŋe âmâ Anutu wan me wan akbiap aregât keiŋe maknengimap. Dâ siâŋe âmâ sinduk baniara yâkgât keiŋe nâŋgâm potat yekmâ ire âlepŋe ire bâleŋe dâm aregât nâŋgâmap. Dâ siâŋe âmâ den siâ siâ makmap. Dâ siâŋe âmâ den siâ siâ are nâŋgâm nengât denân



purikmâ keiņe maknengimap. <sup>11</sup> Akto wan me wan ya maktân ire amâ Anutugât Heakņe konok irekņeak nâņgâ nâņgâ dondâ mem ukenņaet akmâ kinmâ kinmâ nâņgâ nâņgâ are Yesugât kâmot konok konok siâ siâ ârândâņ nengimap.

*Hâknenņe amâ konogâk, dâ siâ me siâņe amâ dondâ.*

<sup>12</sup> Ya maktân aregât den dopņe kulemgowe. Luâk amâ hâk nenņe konogâk amâ siâ siâņe hârok âmâ dondâ. Akto siâ siâņe hârok amâ hâk konogâk are dop hainâk Kristogât kâmot dop konogâk akmaen. <sup>13</sup> Akto Kristogât kâmot nen amâ siâ siâ Yuda luâk âmbâle akto Girik luâk âmbâle akto biken amâ hoņ bawa manmai dâ siâ amâ luâk kotdâ manmai gârâmâ Anutunņe hanâk dâm ikinņaet Heakņe hunņun anđo meme wâtņe aknengimbo hâk biwi konogân agion. <sup>14</sup> Hâk are amâ konok bo. Amâ siâ me siâņe dondâ. <sup>15</sup> Aregât keinennņande hin dâwop, “Nâ bâtņe bo aregât nâ hâkgât bo tatman.” dâwop. Keinennņe amâ hâknennņaet bikņe. <sup>16</sup> Akto ondopnenņe hin dâwop, “Nâ hâkgât dewunņe bo aregât nâ yân hâkgât bo agân.” dâwop. Âlepņe ondop nenņe âmâ hâknennņaet bikņe tatâp. <sup>17</sup> Akto nengât hâknennņe dewunnenņe humo konok akmap dâine ondopnenņe bo tato den bo nâņgâwâen. Akto hâknennņaet ondopnenņe humo konok akmap dâine hâme nenņe bo tato hiņenņe bo nâņgâwâen. <sup>18</sup> Dâ hâknennņe hain bo. Anutunņe ekmâ nâņgâm kinmâ nâņgâ nâņgâņân luâk dewatim konok konok hârok kalep. <sup>19</sup> Akto hâknennņe ikinņeâk bikņeâk konok dâine hâk bunņe amâ bo tatnengiwop. <sup>20</sup> Amâ hain bo. Hâkgât siâ siâņe dondâ.

Dâ amâ hâknennje konogân akmap. <sup>21</sup> Akto dewunnenjande bâtnennje hin maganbop, “Gâ bo tatât dâine nâ nunak âlepje tatbom.” dâwop. Me kautnenjande keinenne hin dâm bo maganbop, “Gâ bo tatât dâine nâ nunak âlepje tatbom.” dâwop. <sup>22</sup> Hain bo hâknennjaet biken amâ kârikje bo dâmai are bo tatâp dâine hâk ire âlepje bo tatbop. <sup>23</sup> Akto nengât hâknennje bikje ekbâirâm are sângumje âlepje tigimaen. Akto hâknennje bikje âlepje dâmaen are amâ bo tigimaen. <sup>24</sup> Gârâmâ Anutuje hain bo akmap yâk hâk keije hârok mem mendugum ketuguep. Aregât hâknennje bikje kotje bo dâmai are Anutuje kot dondâ yengonlep. <sup>25</sup> Yâkne hain agepgât âmâ hâknennje hogoakmâ biken biken akbop. Dâ biken biken tânagum kinbaigât Anutuje hâknennjân kotje bo are dâmaen ikinjeâk ikinjeâk yengonlep. <sup>26</sup> Aregât hâknennjân konokje hâk hilâlâmje nângâmbo hainâk hâknennje hârok hilâlâm nângâmaen. Dâ hâk bikjande âlepje kinbiâ hârok herone akmai. <sup>27</sup> Den ginje yu kulengoân aregât keije hin. Ye Kristogât kâmot hâkyenjaet dop hainâk konogân agi. Akto ye konok konok Kristogât hâkne siâ siâje akmâ manmai. <sup>28</sup> Akto Anutuje Yesugât kâmot are hutnennjân hin katnegep. Nengâlân ulik gulik bikje Aposolo akjet dâm katnegep. Dâ haminjân luâk bikje Anutuje wan me wan akbiap aregât keije makbiâ nângâmaen. Dâ haminjân luâk bikje den kepikmâ makyengimaen. Dâ haminjân kulem kotje siâ siâ memaen. Dâ haminjân kundatdâ hejgem yengumaen. Dâ haminjân kârikje bo tatyengimap are tân yengumai. Dâ haminjân puli me emet me

âigât damunnenne akmai. Dâ bâiŋe âmâ den siâ siâ makmai. Luâk âmbâle ya yeŋgondân are Anutuŋe âi aregât katyegep. <sup>29</sup> Aregât Yesugât kâmot nen âmâ Aposoloâk hârok bo akmaen. Akto Anutuŋe wan akbiap are nen hârok bo makmaen. Akto hârokŋe bo den kepikmâ makyenŋimaen. Akto kulem siâ siâ hârokŋe bo memaen. <sup>30</sup> Akto hârokŋe bo kundatdâ heŋgem yeŋgumaen. Akto hârokŋe den siâ siâ bo makmaen. Akto siâ siâ are nânŋâm bo purikmaen. <sup>31</sup> Akto Anutugât Heakŋe memene aknengimbo wan me wan âlepŋe bikŋe ewangiyekmai are egâlianmâ niŋben dâm Anutu ulilaŋbei. Dâ okot âlep nengimap aregâtŋe siâ siâ hârok ewangi yekmap aregât keiŋe makyenŋiwe.

## 13

### *Han kalemgât keiŋe.*

<sup>1</sup> Galalupne, nâŋe âmâ luâk yeŋgât kepia siâ siâyengât makmâ anelo yeŋgât den hainâk makmâ âmâ han kalem bo akyenŋim âmâ makmakne amâ yân munŋeâk makman. Amâ guŋgâŋe indemap hain makman. <sup>2</sup> Me Anutugât nânŋâ nânŋâ katbiap are nânŋâm makyenŋiman me wan me wan yoŋâk tatmap are nânŋâm meteman me biwine kârikŋe kat katgât tatniŋdo aregât gimbâŋe maganŋdere biken arimap gârâmâ okot âlepgât dâp bo tatniŋdâp amâ yânŋe akman. <sup>3</sup> Me nânŋât siâ siâ hârok luâk âmbâle umburuk yeŋgiwiap me gasa togombiâ hanâk manmanŋe bo gangerâm âmâ hâkne hâkâŋe dâre kâlâwân katnekiâ ombiap. Dâ amâ han kalem bâlâk manman âmâ siân âi aregât hâuŋe bo miawakniŋbiap.

4 Akto luâk siâ han kalem akmâ okot âlep agakgât talaŋbiap arekŋe siâ siâ agaŋmâ dowâk bo kutigitmai. Akto luâk dondâ tân yengumap. Akto luâk siâ me siâ undup miawagaŋdo are nâŋgâmbiâ bo bâliwiâp. Akto âgâ âgâŋe bo akmap. Akto yeŋaet nâŋgâmbiâ bo âgâmap. <sup>5</sup> Akto luâk âgâ âgâŋe kotŋe hanâk hanâk bo makyenŋimap. Akto ikinâet ukeneŋe bo watmâ âmâ galalupŋe yengât ukenyene watmap. Akto kambiamŋe dowâk bo bâlimap me yâkgât akmâ bâli anbiâ are yengât bo nâŋgâmap. <sup>6</sup> Yâk bâleŋande sambelem arimbo nâŋgâmbiâ âlepŋe bo akbiap. Dâ den pat âlepŋande sambelem arimbo nâŋgâmbiâ ârândân akbiap. <sup>7</sup> Yâkŋe umatŋe siâ siâ hârok lokomap. Akto hilâm ârândân Anutugâlân biwiŋe humo katmap. Hain akmâ Anutugât mârur lâmgomap. Akto umatŋe siâ siâgât kârikŋe akmâ kinmap. <sup>8</sup> Akto okot âlep agak meme are amâ dowâk bo boakbiap. Are amâ manmâ manmâ âgâwiap. Dâ Anutugât den âlepŋe makmak arekŋe âmâ âiŋe bo akbiap. Akto den siâ siâ keiŋe keiŋe are amâ bo akbiap. Akto nâŋgâ nâŋgâgât âi meme arekŋe âmâ âiŋe bo akbiap. Dâ okot âlep agakgât amâ bo boakbiap. <sup>9</sup> Akto hinŋe âmâ nâŋgâ nâŋgânenŋe amâ bikŋeâk bikŋeâk nâŋgâmaen. Akto Anutugât den âlepŋe are hainâk bikŋeâk bikŋeâk makmaen. <sup>10</sup> Dâ hâmbâi âmâ wan siâ âlepŋe dondâ arekŋe miawak nengimbo âmâ sop ain siâ siâ bikŋeâk bo akbiap. <sup>11</sup> Ulikŋân nâ nanaŋnân manminiân sop ain nanaŋ yengât den hogoân. Akto nanaŋ gurukŋe han nâŋgâm manminiân. Akto nanaŋyengât nâŋgâ nâŋgâ hain nâŋgâminiân. Dâ hinŋe amâ luâk

humo akmâ kinmâ nanaŋ agak meme are hep-ulân. <sup>12</sup> Akto nen âmâ tu bătgunŋân enem dewun-nenŋe egakmaen are amâ gulip milip akmap. Gârâmâ hâmbâi sop humoân ain âmâ Anutugât enem dewunŋân miawâk ekbaen. Akto hinŋe âmâ bikŋeâk bikŋeâk nâŋgâmaen. Dâ hâmbâi âmâ Anutuŋe keiŋânbak nenekmâ nâŋgâm heŋgemgo nengiep dop hainâk wan me wan hekatnengimbo hârok ekmâ nâŋgâm heŋgemgowaen. <sup>13</sup> Aregât wan me wan amâ hilâmŋe hilâmŋe tatmâ âgâmap are âmâ biwi Anutugâlân kat kat agak meme akto Anutugât lâmgô lâmgô are akto okot âlep kat kat are. Dâ ire konok amâ âlepŋe dondâ hârok ewangiyekmap, okot âlep agak meme are.

## 14

### *Den siâ siâ magi aregât den.*

<sup>1</sup> Galalupne, ye okot âlep agakgât kârikŋe akbei. Akto okot âlep aknengimap aregât Heak âlepŋe siâ siâ nengimap are Anutu ulilanmâ membei. Dâ âi ulik gulik are âmâ hâk hilâlâm akmâ membei amâ hin. Anutugât den âlepŋe makmak aregât Anutu ulilanbei. <sup>2</sup> Aregât keiŋe makyenŋiwe. Luâk siâŋe den siâ me siâ makberâm âmâ Anutu konok maganbiap. Dâ luâk olop kinbai arekŋe Heakŋe meme agaŋdo den siâ me siâ irakŋe tiktikŋe makto aregât yâkgât den bo nâŋgâmbiâ denŋe arekŋe bo tânyenŋumap. <sup>3</sup> Dâ luâk siâŋe Anutugât den âlepŋe makbiap arekŋe amâ luâk âmbâle tânyenŋum nâŋgâ nâŋgâyene are mem kârikŋe ketugumap. Akto agak meme âlepŋe akŋetgât goaŋyekmap. Akto biwiyeŋe mem âlepŋe

ketugum hengem yengumap. <sup>4</sup> Dâ luâk siâne den siâ siâ makbiap âmâ ikinje nângâ nângâ mem kârikne ketugu akmap. Siâ bo tânyengumap. Dâ luâk siâne Anutugât den âlepne makmap are âmâ Yesugât kâmot mem kârikne ketugu yekmap. <sup>5</sup> Ye hârok den siâ me siâ are maknetgât amâ ewiâk. Dâ Anutugât den pat âlepne makyengimbiâ nângâmbiâ âmâ ârândân dondâ akmap. Luâk siâne Anutugât den pat âlepne makmap arekne luâk den siâ me siâ makmap are ewangimap. Gârâmâ den are purikmâ yejaet denân makyengimbo ârândân âlepne akmap.

<sup>6</sup> Aregât siâkâ makbe. Nâne yengâlân aregen togom den siâ me siâ makyengire âmâ ye bo nângâm hengemgomai. Akto togom Anutuje den bikne ninjep me nângâ nângâyene kârikne agâkgât den are me Anutuje wan membiap aregât keine makyengire âmâ ye den are dowâk nângâmbiâ den arekne tân yenguiap. <sup>7</sup> Aregât den dopne siâ makbe. Siâ me siâ golâ bo akmai yânnje kamam me lâmun are âmâ konbiâ munne âlepne bo akto âmâ gain gain nângâwaen. <sup>8</sup> Me luâk siâne kukgât kot pâpkom kondo bâtâne indembo âmâ tembe loko kuk akberâm bo hengem aguwai. <sup>9</sup> Yu maktân are bâlene indembo luâk bo nângâwai aregât yeje dop hainâk luâk bikjande den bo nângâmai are makbiâ âmâ denyene are yânnje akmâ luâk âmbâle siâ bo tânyenguiap. Amâ yân mesok gosok makbai. <sup>10</sup> Akto hânân den siâ siâ dondâ yendâp are âmâ luâk konok konok yejaet den are nângâmai. Akto keine nângâmai. <sup>11</sup> Aregât luâk siâne ikinjaet den nâ bo nângâman are makniņdo nângâm, “Wei,

luâk ire âmâ denyenje siân gâtje.” dâre yâkâ hainâk nekmâ, “Woe, luâk ire âmâ denyenje siân gâtje.” dâm makto nângâ anjiwaet. <sup>12</sup> Akto ye amâ hainâk ye Anutugât Heak âlepñande memenje akyenjimbo wan me wan okot âlepgât miawak nengimap. Are memberâm kârikje akmâ Anutu ulilañmai aregât Yesugât kâmot kârikje yeâkgât aregâlâk nângâm ulilañbei. <sup>13</sup> Hain gârâmâ luâk siânje den siâ me siâ makbiap âmâ ainâk Anutu hin ulilañbiap, “Den maktân ire mem purik katbiangât dop olowâk niñbiat.” dâm ulilañbiap. <sup>14</sup> Aregât hin makbe. Nâñe den siâ me siâ makbian âmâ biwinânâk Anutu ulilañbian. Dâ nângâ nângâne are amâ yân tato bo ârândâñ akbiap. <sup>15</sup> Aregât hin nângân, han biwine akto nângâ nângâne are hârok mem Anutu ulilañbian are âmâ ârândâñ akbiap hain nângân. Aregât ye hain nângâwei. Akto biwinânâk Anutugât kotje mem agat agatgât kep memberâm âmâ ainâk nângâ nângâne olop kep membian. <sup>16-17</sup> Aregât benje ye hain bo akmâ âmâ biwiyenânâk makmâ Anutu okot âlepgât den bunje magañmâ den siâ me siâ magañbiâ denyenje arekñe luâk âmbâle bikñe Yesugâlân gâtje bo are bo tânyenjumap. Bo tânyenjumbo âmâ luâk âmbâle arekñe denyenje bo nângâm hengemgom gain gain, “A bundâk.” dâm makbiap? Denñande bo tângombo aregât bunje bo makbiap. Aregât den âlepñeâk makbiâ denyenje luâk âmbâle bikñe tânyenguwiâp. <sup>18</sup> Akto nâñe ye hârok den siâ me siâ makmai aregât den siâ siâ makmâ ewangiyekman aregât Anutugât mepainje meman. <sup>19</sup> Dâ luâk âmbâle hârok mendugum kinbiâ ainâk âgâm

den getek den yeñân maktere nângâmbiâ nângâ nângâyene kârikne akbiap are nângân. Dâ den siâ siâ bonângâmai are âmâ dondâ makyengim manbian aregât nângâre yânne aktâp.

*Nanan gurukñande nângâmai han hainare bo akbaen.*

<sup>20</sup> Galama, ye nananne han nângâmai hainare bo nângâwei. Dâ agak meme bâlene are âmâ nananne bo nângâmai ye gai hainâk bo nângâwei. Dâ nângâ nângâyene nanan yengât hainâk bo akmâ âmâ luâk âmbâle nângâ nângârâ yengât hainâk akbei.

<sup>21</sup> Anutuñe makto kulemgoyi biken hin tatâp, “Humone hin dâep, “Luâk bikne denyene siâ Yuda luâk are yengâlân hungun yengire arim denyene siâ makyengimbiâ Yudagâtñande hanâk dâm misik nângât laune bo lokowai.” Humone hain dâep.”

<sup>22</sup> Aregât luâk siâne kepia siâgât den makto âmâ den arekne Yesugât kâmot are Anutu mandâp aregât keñe bo makyengiwo. Dâ den arekne luâk âmbâle biwiyene Yesugâlân bo katmai are Anutu mandâp aregât keñe hekatyengimap. Akto Anutugât den âlepne makmak are âmâ luâk âmbâle biwiyene Yesugâlân bo kali are yengât bo. Are amâ Yesugât kâmot are yengât. <sup>23</sup> Aregât ye Yesugât kâmot mendugu akmâ den siâ siâ makbiâ luâk âmbâle nângâ nângâyene bo me biwiyene Yesugâlân bo kali arekne âkâ âgâm âmâ yekmâ, “Woe, Yesugât kâmot sinduk akmai.” dâwai.

<sup>24</sup> Gârâmâ ye hârok Anutugât den âlepne makbiâ luâk siâne nângâ nângâne bo me biwiñe Yesugâlân bo kalep arekne nângâmbo denyene arekne biwiñe



erâmbô ikinjâet agak meme bâleñe nânġâmbo ye are ekmâ yâkgât keñje nânġâm heñgemgowai. <sup>25</sup> Akto yâkgât bâleñe miawakto aregât hâkñje mendo gembô Anutugât kotñje mem agatmâ yekmâ hin dâwiap, “Bundâk, Anutu hutyeñân tatâp.” dâwiap.

*Mitigât menduguwerâm âmâ han gâliwân bo menduguwaen.*

<sup>26</sup> Hain gârâmâ gain akbai? Menduguwaiân siâ amâ kepgât. Dâ siâñe âmâ makyenġiwiapgât membiâp. Dâ siâ âmâ Anutuñe wan me wan akbiap aregât keñje makyenġiwiap. Dâ siâ âmâ den siâ siâ makbiap. Dâ siâ âmâ den are purikmâ den yeñân makbiâp. Are amâ hârok luâk âmbâle mem kârikñje ketugu yekmapgât. <sup>27</sup> Akto hanâk dâm den siâ siâ makberâm akbiâ ainâk luâk konok me lâuwâ areâk den siâ siâ makbai. Akto hârokñje olowâk den bo akbai. Siâñe soñ makto siâñe hamiñân makbiap hain akbai. Hain akbiâ âmâ siâñe âmâ den are purikmâ makyenġiwiâp. <sup>28</sup> Dâ den purik purik luâk bo tato âmâ luâk den siâ me siâ makmai arekñje menduguwaiân ain yân kinmâ ikinjak Anutu olop den akbiandat. <sup>29</sup> Akto Anutugât den âlepñe makmai arekñje lâuwâ me âlâwu akmâ konok konok makbei. Hain akbiâ luâk âmbâle bikñande den mem potatmâ nânġâm heñgemgowai. <sup>30-31</sup> Akto Anutugât den âlepñe are konok konok makbiâ ye hârok nânġâmbiâ nânġâ nânġayeñe kârikñje akto biwiyeñe owâiñe agakgât hin akbei. Yâkgâlân gâtñe siâ tato Anutuñe den siâ kalañdo âmâ benñe luâk emelâk kinmâ makyenġimap are âmâ âlepñe makyenġim metemboân ainâk âlepñe agatmâ makyenġiwiap. <sup>32-33</sup> Akto Anutu amâ

gulip melipgât amboņe bo. Yâk amâ biwinenņe sânduk gewiapgât amboņe akto lumbegât amboņe aregât Anutugât den makyenņiwerâm âmâ yeņaet biwiyeņe damunņe akmâ kinmâ makyenņiwei.

*Âmbâlēņe mitigât mendugum tatmâ den bâlâk tatbei.*

<sup>34</sup> Akto Yesugât kâmot hârok mindugum kinbiâ ainâk âmbenlupyenņande bo makyenņimai. Yeņgât âmbenlupyenņe menduguwaiân yân tatbei. Yâkņe den bo makbei. Yâkņe âmâ amukyenņân tatbai aregât keiņe Anutuņe makto Mosenņe kulengoep hain tatâp aregât âmbenlupyenņe menduguwaiân âgâm âmâ yân nânġâmâk tatbei. <sup>35</sup> Akto âmbâlēņe mete kinmâ makyenņimbo âmâ bo ârândân akmap aregât yâkņe den siâ keiņe nânġâwerâm akbai âmâ emetyenņân tatmâ luâklupyenņe aiyenņuwai. <sup>36</sup> Akto yeņgât agak meme nânġâre bâlēņe aktâp. Ye hin dâmai, “Anutugât keiņe nengâlân soņ miawagep akto nenņeâk Anutugât keiņe nânġâmaen.” ye hain nânġâmai aten. <sup>37</sup> Akto areâk bo. Yeņġâlân bikņe agatmâ hin dâmai, “Anutugât keiņe emelâk nânġâm meteyion akto Anutugât Heak âlepņande kautnennân mendo nânġâ nânġânenņe humo agep.” dâmai amâ hin nânġâwei. Den yu nânē kulengoân ire âmâ Humonenņaet den kârikņe oyanbiâ bunņe akbiâp. <sup>38</sup> Akto hain bo nânġâmbiâ aregât nenņe luâk aregât bo nânġâ anmâ manmaen. <sup>39</sup> Galalupne, den kâlep yu kulengoân aregât keiņe bâlensiâ Anutugât den makyenņiwai areġâlâk nânġâm Anutu ulilaņbai. Akto siâņe den siâ me siâ makberâmbiâ bo kom hârewei. <sup>40</sup> Hain akmâ nânġâm mem henġemġewei

akto menduguwaiân han biwi konok akmâ manbei.

## 15

### *Yesu momoñânba agalep.*

<sup>1</sup> Galalupne, nâñe emelâk Anutugât den pat âlepñe makyenjiân. Makyenjiñe ainâk nâñgâm mem manmâ gayi. Akto ye hinñe den pat âlepñe aregât kârikñân kinmai aregât keñe nelâmyenjiwopgât yu kulemgoân aregât nâñgâ nâñgâyene hulañagâkgât ire makbe. <sup>2</sup> Akto ulikñân bo henengiât dâm den pat makyenjiân are kârikñe membiâ Anutuñe hengemyenjiuep. Dâ denñe hâkâñe akbiâ âmâ den hengemyenjiuep are yânñe akbiap. <sup>3</sup> Humonenñande den umatñe are soñ makniñep are mem makyenjiân are keñe amâ hin. Ulikñân Anutuñe makto kulemgoyi bunñe akto Kristoñe nengât dosanenñe watberâm akmâ aregât mondo dosanenñe bo agep. <sup>4</sup> Mondo sumân hangombiâ yem hilâm âlâwuñân yem momoñânba agalep aregât keñe amâ Anutuñe makto kulemgoyi. <sup>5</sup> Akto momoñânba agatmâ Peto miawaganjo egep. Haminñan hoñ bawalupñe keiân konok yenğâlân miawakyeñjimbo egi. <sup>6</sup> Benñe haminñan luâk âmbâle hanyene yâkgâlân kali dondâ are yenğâlân miawakyeñjiep. Akto Yesugât kâmolân gâtñe 500 hain are ain kinbiâ are yenğâlân miawakyeñjimbo egi. Akto luâk âmbâle are âmâ bikñe hinñe mandâi. Dâ amon siâ emelâk moyi. <sup>7</sup> Benñe ainba Yakobo yâkgâlân miawaganjep. Benñe aregât haminñan Aposolo hârok yenğâlân miawakyeñjiep. <sup>8</sup> Akto bânñe

memeñande nananj mesokmâ panmap nâ dop hain akmâ miawakmâ malân nângâlân miawakniñdo egân. <sup>9</sup> Aregât nângât keine hin. Yesugât Aposololupñe bikñande nâ ewangi nekbiâ yânñe agân. Akto nâñe Anutugât kâmot Yesugâlân biwiyenñe kali are hilip yenğuân aregât luâkñe Aposolo dâm bo yenğunmai nâ hain are agân. <sup>10</sup> Gârâmâ bâleñe agân are hâuñe Anutuñe bo niñmâ damunne akmâ han kalem akmâ meme akniñep aregât agak meme hinñe meman. Akto Anutuñe okot âlep nângâ niñep are yân bo tatâp. Nâñe âi kârikñe mem Aposolo bikñe ewangi yegân. Are âmâ nunak bo. Anutuñe okot âlep niñmâ memeñe akniñep arekñe nângât agak meme are mem miawagep. <sup>11</sup> Akto hanâk nâñe me Aposolo bikñe makyenñienñe nângâyî aregâlâk bo nângân. Biwiyenñe Yesugâlân kali aregâlâk nângân.

*Yesu golâ akmâ agalepgât nenâkâ golâ akbaen.*

<sup>12</sup> Akto yenğâlân gâtñe bikñe hin dâmai, “Luâk âmbâle moyi are âmâ bo agatbai.” dâmai are nângâre dondâ bâliep. Akto nenñe Yesu mondo Anutuñe goañdo agalep aregât denñe makmaen aregât wangât hutyenñân gâtñe bikñande hin dâmai, “Luâk âmbâle moyi are âmâ bo agatbai.” dâmai? <sup>13</sup> Dâ luâk âmbâle momoñânba bo agatbai den are bunñe dâine hin dâwâen Anutuñe benñe Yesu gai bo goañdo agalep dâwâen. <sup>14</sup> Dâ Anutuñe Yesu bo goañep dâine nenñe den makmaen ire bunñe bo akbop. Akto biwiyenñe Yesugâlân kali are hainâk bunñe bo akbop. <sup>15</sup> Dâ hain dâine nen Anutuñe Kristo goañdo agalep dâmaen nen âmâ Anutugât keñe makmaen den are hianğim mem bâliwâen.

Amâ momonande bo agatbâi. <sup>16</sup> Dâ Anutuŋe luâk momonânba bo oloŋ yekmap dâine Yesu gai hainâk bo oloŋbop. <sup>17</sup> Dâ Anutuŋe Yesu bo oloŋep dâine ye biwiyenŋe Yesugâlân kali are bâliwop akto dosayenŋe olowâk manbâi. <sup>18</sup> Akto luâk âmbâle biwiyenŋe Yesugâlân katmâ kinmâ moyi arekâ hainâk yân manmâ âgâwâi. <sup>19</sup> Akto nen hân iregât manman âlepŋe aregât han biwinenŋande Kristogâlân nânġâm kepilâmaen nenâmâ manman âlepŋe are bo miawak nengimap are bunŋe bo dâine nengât umatŋe dondâ arekŋe luâk âmbâle siâgât umatŋe ewangimap arekŋe miawak nengiwoŋ. Aregât luâk âmbâle hârokŋe nengât okot nânġâ nengiwaî.

<sup>20</sup> Gârâmâ hain bo. Kristo emelâk mondo Anutuŋe goanġo agatmâ luâk momoŋe yâk ulikŋân akyenġim agalep. <sup>21</sup> Amâ hingât. Ulikŋân Anutuŋe luâk konok kotŋe Adam are ketugumbo malep yâk âmâ nengât keinenŋe aregât yâk bâleŋe akto momogât pat miawakto luâk âmbâle hârok momaen. Dâ hainâk Yesu Kristo amâ luâk konok Humonenŋande gem mondo goanġo agalep. <sup>22</sup> Aregât Adam gâlân dewatim mom metemaen. Dâ Kristo olop dewatim akmaen nenŋe âmâ mom âmâ agatbaen. <sup>23</sup> Hain akmâ âmâ Anutuŋe magep dopŋân agatbaen. Hin. Moyi are yenġâlân Kristoŋe soŋ ulik gulik agalep. Akto hâmbâi purik katmâ miawakbiawân nen Yesugât kâmolân gâtŋe nen hamiŋân âmâ agatmâ manman golâk manbaen. <sup>24</sup> Sop ain âmâ siâ siâ hârok bo akbiap. Akto Anutuġât Nanŋande Anutu wan me wan hârok are nengât kautŋe Humo akbiapġât dâm Ewenande siâ siâ amukŋân kalep. Sinduk baniara bâleŋe akto gawamangât âi are gai kondo bo akbiap.

<sup>25</sup> Akto âi luâk kautnenne akto luâk kotdâ akto luâk kârik kârikne are Nannaet keinaet amuknân kato tâliyekbiap benne yâk kautnenne humo akbiap ain hârok Eweñe wanbiap. <sup>26</sup> Tatmâ âgâm âgâm gasa are erâm hambu yekbiap. Dâ bânne gasa konogâk tatbiap are âmâ momogât dop akai bânin dâm kondo bo akbiap. <sup>27</sup> Aregât Anutuñe Kristogât makto kulemgoyi bikne hin tatâp, “Anutuñe ikinje honj bawagât amuknân siâ siâ katbiap hain tatâp.” Gârâmâ Anutuñe hain akbiawân ikinje amuknân bo kalakbiap. Akto sop humoân den are bunne akto aregât Kristone âmâ luâk âmbâle me wan me wan kotne hârok kautnenne tatbiap. <sup>28</sup> Hain akmâ bânin dâm Amboñande wan me wan nannaet amuknân kato talep yâkne hârok damunyenje agâkgât amuknân tatmâ manmâ âgâwiap.

<sup>29</sup> Akto yenğâlân gâtne bikñande momoñe tânyenğuerâm tu pulinenekñet dâm manmai. Dâ Yesu agalep den are bunne bo dâine momoñe siâñe bo agatbop amâ momogât akmâ bikñande wangât tu puliyekmai? <sup>30</sup> Dâ nen hainâk wangât umatñân manmâ bâsok momaen? Den makyenğimaen are bunne bo dâine emelâk den are hepundenne bo hilip nenguwâi.

<sup>31</sup> Yesu Kristo Humonenne nâ akto ye henğem nenguep aregât yenğât ukenyenje akman aregât hin makyenğire nânğâñet. Hilâm ârândâñ nâñe âi meman âmâ momogât pat meman. <sup>32</sup> Akto hânğâlâk nânğâmai nâ hainâk akman dâine wangât Epeso kepien sonjo metne hainare olop aguagân. Aregât wan siâ bunne miawakniñbiap? Akto hânğâlâk nânğâmai arekne hin dâmai, “Hâmbâi

mombaen aregât dowâk sot tu nemâk heronje akbaen.” dâmai. Akto Yesu bo agalep dâine nenje hain dâwâen. Hângâlâk nângâwâen. <sup>33</sup> Aregât biwiyenje are bâliwopgât luâk âmbâle Yesu bo agalep dâmai are hepun yekbei. Nenje luâk bâleje olop bam gutbaen amâ yâkne agak memenenje âlepne nenje hilipko nengiwâi are nângâm hejngemgom amâ hanokoakbei. <sup>34</sup> Akto bikne hutyenâmba Anutugât boâk nângâi den ire amâ ye anun meyenjiân. Aregât momonâmba agatbaengât nângâm hejngemgom amâ nângâ nângâ bâleje hepunbei.

*Hâknenne towatne siâ mem agatbaen.*

<sup>35</sup> Akto yengâlân gâtne siâne hin ainuguwiap, “Luâk momone amâ gain gain agatbai? Akto hâk gain hinare mem togowai?” dâwiap aregât den hâuje hin makbe. <sup>36-37</sup> Amâ den kopane. Gâ senjo urutmenâ hân kâlegen yem nasukne akmâ bim âgâm amâ pâtkom kâmne gamap. Aregât gâ wan siâ siâ ya kâmetmat are amâ yânne me momone hain are kâmetmat. Dâ are pâtkom amâ hâkne golâ koane hain are bo pâtkomap are nângâm hejngemgo. <sup>38</sup> Anutune koane amâ ikinje konok konok hâkne siânaet yengimap. Akto kâmetenne pâtkom amâ hainâk hâkne siâ siâ koane hinare bo pâtkomap aregât keine Anutune ikinjak nângâm hejngemgoep. <sup>39</sup> Akto areâk bo. Anutune luâk me songo me duki kâwâluki are hâknenne konok bo katnengiep. Luâk nengât hâknenne siânaet. Akto songo yengât are siânaet. Akto lâut yengât are siânaet. Akto injan yengât siânaet. <sup>40</sup> Dâ himbimân tatmai hâkyene siâ. Nen hânân manmaen nengât

egeknenne amâ siâ. Akmâ himbimân tatmâ ariâi are kulemne siâ. Akto hânân tatmâ ariâi are kulemne siâ. <sup>41</sup> Dewutâ hilâmân gâtneet are siâ akto hândâgân gâtne are siâ akto diâ are siâ siâ hârok are. Akto diâ pagaleyene konok bo. Keine keine tatâp. <sup>42</sup> Aregât luâk momone agatbaen are akai hainâk tatâp. Amâ hâknenne hangomaen are âmâ hambumap. Dâ otnenenne akto hâknenne irakne Anutune mem agatbiap are bo hambuwiap akto bo bâliwiap. <sup>43</sup> Akto hâknenne amâ pagalene olop bo aregât mombiap âmâ yân kârikne bo tatbiap. Dâ agatbaenân amâ hâknenne irakne pagalene olop Anutune mem agatbiap are kârikne dondâ tatnengiwiap. <sup>44</sup> Akto hâknenne tâmbâ ire amâ hângât aregât mondenne hâknenne hangombiâ hân akbiap. Dâ hâknenne irakne hâmbâi Anutune mem agatmâ nengiwiap are amâ manman kârikneet.

<sup>45</sup> Akto Anutugât luâkne kulemgoyi bikne hin tatâp, “Luâk ulik gulik Adam yâk golâ akmâ agalep.” hain kulemgoep. Dâ beirâ Adam baine hinare Heakdâ manman nengiwiapgât ambone agep <sup>46</sup> amâ Heakdâ yâkne ulikne bo agep. Hânân gâtne son ulikne miawagep gârâmâ Heakdâ beirâ giep. <sup>47</sup> Akto hân luâk ulikne are amâ Anutune hân nukum mem mângiep. Dâ beirâ luâk yâk âmâ himbimânba giep. <sup>48</sup> Aregât hânân gâtne malep hainâgâk hânân gâtne manmai. Dâ himbimân gâtne manmap dop hainâgâk himbimgât pat mem manmaen. <sup>49</sup> Akto hinne âmâ ulik gulik luâk Adamgât hâkne hainâk akmâ manden aregât hângâlâk akmaen aregât hâmbâi himbimân



gâtnaet dâwân manmap are amâ hainâk akmâ manbaen.

*Yesu togombo âmâ himbim hâk membaen.*

<sup>50</sup> Galalupne aregât siâkâ makbe. Hâknennande amâ Anutugât manman âlepne bo membiap. Akto siâ me siâ hambum torok akbiapne siâ me siâ tat tat kârikne are bo membiap. <sup>51</sup> Nângânet. Imâ den tipne siâ makmâ miawakyeŋgiwe. Nen bo mom metewaen. Amâ nen hârok purik âgâm hâk siâ akmâ metewaen. <sup>52</sup> Amâ lâmun humo mun akto sânsânâk hain akbaen. Lâmun humo mun akto ainâk momonande agatmâ mom hambu bâlâk manbaen. Nen hârok tirip siâ akbaen. <sup>53</sup> Hâknenne ire hambuwiap arekne manman kârikne are sângum hinare lugumbo gewiap. Akto momogât patjande manman kârikne lugumbo gewiap. <sup>54</sup> Haingât hambum torok akbiap arekne manman kârikne lugumbo gewiap. Akto momogât patjande manman kârikne lugumbo gewiap sop ain Anutugât den kulemgoyi bikne kârigewiap amâ hin,

<sup>55</sup> “Wei momogât pat kârikneŋe yâgâte? Akto momogât pat agakne metje hamepne yâgâte? Amâ bo agep.”

<sup>56</sup> Amâ bâlenjaet patjande âmâ momogât metje hamepne aktâp. Akto den kârikneŋe amâ bâlenjaet metje hamepne mem miawaktâp. <sup>57</sup> Dâ Anutune Kembu nenne Yesu Kristo agando manman gât kârikne mem miawaknengimapgât mepainje meniâm. <sup>58</sup> Aregât, galalupne, âlepne yeŋe kârikne akmâ tâlim kârigem kinbei. Akmâ Kembugât âi sop ârândân kârikne aganjmâ membei. Amâ Kembugât

akmâ bunje bo akbiap hain nângâm âi mem manbei.

## 16

*Yerusalem yengât puli mem arim yengiwerâm magep.*

<sup>1</sup> Akto Anutugât kâmot tânyengune dâm puli katnetgât yu makbe. Nâje emelâk Galatia hânân malân sop ain kepia siâ siâ arim Yesugât kâmot puligât keije makyengiân aregât hinje Yesugât kâmot yengiwerâm menduguwai iregât den makyengire nângâm hainâk akbei. <sup>2</sup> Sonda ârândân siâkâ ikiyeâk ikiyeâk tâwât dewunje Sonda ungunân meyi aregât dopnân nângawei. Nângâm kinmâ bikje potatmâ hejenggom katbiâ emet yenân tatbiap. Hain gârâmâ hâmbâi nâ togowianân aregât bo undâgâtmâ âmâ puli are dowâk mem miawakbai. <sup>3</sup> Akto hâmbâi nâ togore yejeak luâk bikje mem katyekbiâ luâk âlepje aregât kulem esenje yengire Yerusalem luâk âmbâle umburuk manmai are yengât okot âlepgât puli kali are yengimbiâ ariwai. <sup>4</sup> Benje nâ olop arine dâre âmâ olop ariwaen.

*Pauloje yâk yengâlân ariwerâm sop kalep.*

<sup>5</sup> Galalupne togowian aregât keije makyengiwe. Nâje Makedonia hânân arim kepianje kepianje âgâm bam gutmâ manmâ hân are hâtikowian aregâlâk nângân. Hain aktere bo akto âlepje yengâlân togo miawakbian. <sup>6-7</sup> Akto hinje sop tâlâwâk olop tatmâ ye konok bo yekberâm dowâk ariwian hain borân. Dâ Humoje âlepje makniñbiap âmâ benje ye olop tatmâ

manmâ âgâwian. Tatmâ mandere tânâk sopne bo akto benje are haminân siângen ariwian. Ariwerâre yeje tân nugum manjan nekbiâ aregât kambiamne âlepne akto yâgâten me yâgâten dowâk âlepne ariwian. <sup>8-9</sup> Gârâmâ unjak Epeso kepiân âi humo tatniñdâp âi ire mem âmâ makyengim mandere bunje miawakbiap aregât dop tatâp. Aregât nângât gasa dondâ yendâp. Are nângâm in tatere Heak giep aregât hilâm bo akbiap. Bo akto Makedonia ain arim manmâ manmâ hepunmâ yengâlân togowian. <sup>10</sup> Akto Timoteo âmâ hinje Humogât âi nunak meman yâk hainâk Humogât âi memap aregât hâmbâi âmâ yâk yengâlân togowiap. Togombo tângombiâ hutyeñân biwi sânduk mem manbiap. <sup>11</sup> Hain gârâmâ yengâlân gâtne yâkgât nângâmbiâ yânje akto hamep bo agañbei. Dâ Paulogâlân âlepne ariwian dâmbô âmâ yeukne ketugum benje hâmbâi dâp mem kalanbiâ yâk akto Yesugât kâmot bikne nângâlân togowei. Are lângoân aregât laune lokom tângombiâ biwiñe sândugembo bikne olop nângâlân togowei.

<sup>12</sup> Akto galanenje Apolo yâkgât den pat amâ hin. Nâje sop kâlep goañmâ hin magañân, “Yesugât kâmot bikne Korinti kepiân ariwerâm aktâi aregât gâ yâk olop ariwei.” dâre borâm kârikne aktâp. Dâ hâmbâi yâkne sop ekto âlepne akto yengâlân togowiap.

### *Den bâiñe.*

<sup>13</sup> Galama, ye ekmâ hengemgom Humogâlân biwiyeñe kârikne katmâ manbei. Akto gasa yengât bo hamep akmâ âi mem kârikne akmâ tatbei.

14 Wan me wan hârok memberâm âmâ are amâ galalupyenê akto Anutu agak meme biwi wan wanân okot âlepgât membei.

15 Akto yengâlân gâtne siâ kotne Stepana akto yâkgât kâmotne Akaia hânân yâkne son biwiyenê Yesugâlân kali. Akto sop ainba ukenyenê akmâ Yesugât kâmot tânyengum âgâyi. 16 Nâne ye luâk hainare amukyenân tatnet dâm goanyektân. Akto galalupne luâk dondâne kârikne akmâ âi memai yâk yengât amuknân manbei.

17-18 Akto ye nâ olop bo tatâi aregât kambiamne indeâp gârâmâ luâk âlâwu kotyenê Stepana akto Potunato akto Akaiko biwiyenê mem sândukne ketugumai aregât biwine âlepne akto herone dondâ nângân. Hain gârâmâ ye hanâk luâk hainare yengât amukyenân manbei.

19 Akto Yesugât kâmolân gâtne Asia in manmai arekne yengât nângâmbiâ herone akmap akto luâk âmbâi lâuwâ kotyetne Akuila akto Pirisila akto Yesugât kâmot emet yetnân âgâm mindugum kinmâ Anutugât pat makmai are Kembangât akmâ egâlian dondâ akyengiâi. 20 Akto areâk bo. Nen ire hârok biwinenê Yesugâlân kalion nenê yengât herone marone akmaen. Akto ye Anutugât luâk âmbâle aregât mangan akbei.

21 Akto emelâk maktân are maktere luâk siâne kulengoâp. Dâ den bikne ire âmâ Paulo nunak okot nângâyengiân aregât bâtnande kulengoân.

22 Akto luâk âmbâle siâne Humonenjaet okot âlep bo wanbiap Anutunê yâk hilip kowiapgât ulilanân. O Humonenê gâ dowâk togowen.

23 Humonenê Yesu Kristone damunyenê akmâ

okot âlep akyeŋgim memeŋe akyeŋgiâkgât  
ulilaŋdân.<sup>24</sup> O Galalupne, ye Yesu Kristogât kâmot  
aregât yeŋgât okot âlep dondâ nâŋgân.

**Yusugât Pat Âlep Den**  
**The New Testament in the Timbe Language of Papua**  
**New Guinea**  
**Nupela Testamen long tokples Timbe long Niugini**

copyright © 1987 Wycliffe Bible Translators, Inc.

Language: Timbe

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 11 Nov 2022 from source files dated 9 Oct 2020

03f82704-6ad1-5094-a78e-e240d9f2d4f8